



An Bhruiséil, 28 Feabhra 2020
(OR. en)

6426/20

**Comhad Idirinstitiúideach:
2019/0152(COD)**

**RECH 83
COMPET 95
EDUC 81
CODEC 142**

TORADH NA nIMEACHTAÍ

ó: Ardrúnaíocht na Comhairle

chuig: na toscaireachtaí

Uimh. an doic. 6137/20 + COR1 + ADD1
roimhe seo:

Uimh. an doic. ón 11227/19+ADD1
gCoim.:

Ábhar: Iarscríbhinn a ghabhann le Clár Oibre Straitéiseach um Nuálaíocht na hInstitiúide Eorpaí um Nuálaíocht agus Teicneolaíocht (EIT)
Cur chuige ginearálta

Gheobhaidh na toscaireachtaí i gceangal leis seo téacs an chur chuige ghinearálta pháirtigh i ndáil leis an Iarscríbhinn a ghabhann le Clár Oibre Straitéiseach um Nuálaíocht na hInstitiúide Eorpaí um Nuálaíocht agus Teicneolaíocht (EIT), mar a ghlac an Chomhairle (Iomaíochas) é ag an gcruinniú a bhí aici an 28 Feabhra 2020.

IARSCRÍBHINN A GHABHANN LEIS AN TOGRA LE hAGHAIDH CINNEADH Ó PHARLAIMINT NA HEORPA AGUS ÓN gCOMHAIRLE MAIDIR LEIS AN gCLÁR OIBRE STRAITÉISEACH UM NUÁLAÍOCHT DEN INSTITIÚID EORPACH UM NUÁLAÍOCHT AGUS TEICNEOLAÍOCHT (EIT) 2021-2027: BORRADH A CHUR FAOI THALLANN AGUS FAOI CHUMAS NUÁLAÍOCHTA NA hEORPA

IARSCRÍBHINN

Clár na n-ábhar

1.	Réamhrá	9
1.1.	Cúlra.....	10
1.2.	Na Príomhdhúshláin	12
1.3.	Seasamh in Fís Eorpach	13
2.	Caighdeán a ardú: straitéis EIT in 2021-2027	15
2.1.	Cuspóirí sonracha EIT	16
3.	Borradh a chur faoi thallann agus faoi chumas nuálaíochta na hEorpa: Na príomhghníomhaíochtaí	16
3.1.	Tacaíocht do PENanna atá ann cheana	17
3.2.	Tionchar réigiúnach PENanna a mhéadú.....	18
3.3.	PENanna nua a sheoladh.....	20
3.4.	Tacú le cumas fiontraíochta agus nuálaíochta an ardoideachais	21
3.5.	Gníomhaíochtaí trasghearrtha EIT.....	24
3.5.1.	Cumarsáid	24
3.5.2.	Dea-chleachtais a aithint agus a chomhroinnt le geallsealbhóirí	26
3.5.3.	Comhar idirnáisiúnta.....	27
3.6.	É a chur ag obair: An modh oibríochta	27

3.6.1.	Samhail oibríochtúil PEN	28
3.6.2.	Samhail cistiúcháin PEN	30
3.6.3	Caidreamh EIT le PENanna tar éis fhoirceannadh an creat-chomhaontú comhpháirtíochta.....	33
3.7.	Sineirgí agus comhlántachtaí le cláir eile	33
4.	Acmhainní.....	36
4.1.	Riachtanais bhuiséadacha	36
4.2.	Tionchar (faireachán agus meastóireacht)	38
4.2.1.	Tuairisciú agus Faireachán	38
4.2.2.	Meastóireacht, athbhreithniú eatramhach agus measúnú cuimsitheach	42
5.	Iarscríbhinn 1A	44
6.	Iarscríbhinn 1B	44

1. RÉAMHRÁ

Sa Chlár Oibre Straitéiseach um Nuálaíocht (COSN) leagtar amach na réimsí tosaíochta agus an straitéis maidir leis an Institiúid Eorpach um Nuálaíocht agus Teicneolaíocht (EIT) don tréimhse 2021-2027. Sainítear ann na cuspóirí, na príomhghníomhaíochtaí, an modh oibre, na torthaí a bhfuiltear ag súil leo, agus na hacmhainní a bheidh de dhíth. Áirithítear le COSN an comhleanúnachas is gá idir EIT agus an [togra maidir le Fís Eorpach], arb é atá ann clár réime an Aontais don taighde agus don nuálaíocht don tréimhse 2021-2027.

Tá COSN 2021-2027 bunaithe ar an measúnú tionchair a rinne an Coimisiún Eorpach. Tugtar san áireamh ann an dréacht-COSN ó Bhord Rialaithe EIT a cuireadh faoi bhráid an Choimisiúin Eorpaigh an 20 Nollaig 2017, i gcomhréir le Rialachán EIT¹. Léirítear ann an [togra (nua) maidir le Fís Eorpach] ón gCoimisiún Eorpach Meitheamh 2018 agus, go háirithe, ról ríthábhachtach EIT ina cháil mar chuid de Cholún [na Nuálaíochta Oscailte] (Colún III), agus an chaoi a rannchuidíonn sé le haghaidh a thabhairt ar dhúshláin dhomhanda lena n-áirítear spriocanna i ndáil le cuspóirí aeráide atá leagtha síos, an t-iomaíochas tionsclaíoch Eorpach (Colún II) agus an eolaíocht barr feabhais (Colún I). Cuireann COSN leis na ceachtanna a foghlaimíodh le blianta anuas maidir le feidhmiú EIT agus le torthaí próisis comhairliúcháin leathain le páirtithe leasmhara tábhachtacha.

Cuirtear san áireamh in COSN Pleanáil Straitéiseach Fís Eorpach chun comhleanúnachas a áirithiú le gníomhaíochtaí an Chláir Réime, mar aon le sineirgí le cláir ábhartha eile de chuid an Aontais, lena n-áirítear na cinn siúd a bhaineann leis an gComhaontú Glas don Eoraip. Is aidhm dó freisin comhlántacht agus sineirgí a mhéadú idir na gníomhaíochtaí EIT agus na cláir agus tosaíochtaí cistiúcháin náisiúnta agus réigiúnacha.

¹ Rialachán (CE) Uimh. 294/2008 ó Pharlaimint na hEorpa agus ón gComhairle an 11 Márta 2008 lena mbunaítear an Institiúid Eorpach um Nuálaíocht agus Teicneolaíocht (IO L 97, 9.4.2008, lch. 1). Arna leasú le Rialachán (AE) Uimh. 1292/2013 ó Pharlaimint na hEorpa agus ón gComhairle an 11 Nollaig 2013 (IO L 347, 11.12.2013, lch. 174).

1.1. Cúlra

Bunaíodh EIT in 2008 d'fhoill rannchuidiú leis an bhfás eacnamaíoch inbhuanaithe agus le hiomaíochas trí chumas nuálaíochta na mBallstát agus an Aontais Eorpaigh a atreisiú. Bhí sé ina cheannródaí i ndáil leis an oideachas, cúrsaí gnó agus an taighde (triantán an eolais) a chomhtháthú agus cuireadh béim láidir ar thallann na fiontraíochta agus scileanna nuálaíochta.

Is trí Phobail Eolais agus Nuálaíochta (PENanna), ar comhpháirtíochtaí Eorpacha ar scála mór iad mar a thagraítear dóibh in Fís Eorpach idir eagraíochtaí oideachais, oiliúna, gnó agus taighde, is mó a fheidhmíonn sí. Ocht gcinn de PENanna a fheidhmíonn sna réimsí seo a leanas: athrú aeráide, claochlú digiteach, fuinneamh, bia, sláinte, amhábhair, soghluaisteacht uirbeach agus déantúsaíocht bhreisluacha.

Tá gach ceann de na PENanna sin eagraithe thart timpeall ar ionaid chomhlonnaithe (ICLanna²) darb aidhm gníomhú mar mhoil gheografacha chun triantán an eolais a chomhtháthú go praiticiúil. Eagraítear agus struchtúraítear iad de réir a gcomhthéacs náisiúnta agus réigiúnaigh faoi seach agus cuireann siad le gréasán uile-Eorpach de shaotharlanna, oifigí agus campais na gcomhpháirtithe PEN atá ann cheana.

Is é is cuspóir do na PENanna punanna de ghníomhaíochtaí thriantáin an eolais a réachtáil trí bhíthin an méid seo a leanas:

- *Gníomhaíochtaí oideachais agus oiliúna* a bhfuil míreanna fiontraíochta láidre iontu chun an chéad ghlúin eile de dhaoine cumasacha a oiliúint, faoina n-áirítear dearadh agus cur chun feidhme clár ar a mbronnfar an lipéad EIT³, ar leibhéal máistreachta nó dochtúireachta go háirithe. Tá clár oibre oideachais EIT ríthábhachtach chun nuálaithe ardfhiontraíochta agus ardoilte a fhorbairt;

² Is éard is ionad comhlonnaithe ann mol fisiciúil ina gcuirtear naisc agus comhoibriú gníomhach chun cinn i measc ghníomhaithe thriantán an eolais, agus a ghníomhaíonn mar a bheadh coimeádaí geataí ann trína bhféadann comhpháirtithe PENanna rochtain a fháil ar shaoráidí agus ar an saineolas is gá chun a gcuid cuspóirí a shaothrú.

³ Is é atá i lipéad EIT séala cáilíochta a bhronnann EIT ar chlár oideachais PEN a bhíonn i gcomhréir le critéir cháilíochta shonracha a bhaineann, *inter alia*, leis an oideachas fiontraíochta agus le curaclaim nuálacha 'foghlaim trí ghníomhaíocht'.

- *Gníomhaíochtaí a thacaíonn leis an nuálaíocht* chun táirgí, próisis agus seirbhísí nuálacha a fhorbairt a dhíríonn ar dheiseanna gnó áirithe;
- *Gníomhaíochtaí forbartha agus tacaíochta gnó*, amhail scéimeanna luasaire chun cabhrú le fiontraithe fiontair a bhfuil rath orthu a dhéanamh dá gcuid smaointí agus chun dlús a chur leis an bpróiseas fáis.

Murab ionann agus ionstraimí nuálaíochta eile, díríonn EIT ar na dúshláin dhomhanda trí thriantán an eolais a chomhtháthú, agus gníomhaíochtaí ardoideachais á gcomhtháthú i slabhra breisluacha na nuálaíochta. Cuidíonn cur chuige EIT le nuálaíochtaí incriminteacha agus nuálaíochtaí suaiteacha araon chun aghaidh a thabhairt go héifeachtach ar theipeanna margaidh agus chun cuidiú le claochlú tionscail. Faoin gcur chuige sin is féidir straitéisí fadtéarmacha a fhorbairt chun aghaidh a thabhairt ar dhúshláin dhomhanda agus cuidítear le creatdálaí a fhorbairt atá bunriachtanach do theacht chun cinn éiceachórais nuálaíochta atá ag feidhmiú go maith agus faoinar féidir borradh a theacht faoin nuálaíocht. Tá sé socraithe mar chuspóir ag EIT go mbeidh na PENanna inbhuanaithe ó thaobh airgeadais de, agus is gné ar leith é sin darb aidhm ar deireadh ionstraim nuálaíochta atá dírithe ar ghnó agus ar thorthaí a bhaint amach. Ós amhlaidh atá, ní mór do na PENanna straitéisí cruthaithe ioncaim a fhorbairt agus a chur chun feidhme chun a n-éiceachóras nuálaíochta a chothabháil tar éis na tréimhse ama a chumhdaítear leis na comhaontuithe deontais.

Ar an gcaoi sin, cuireann EIT ardán dinimiciúil ar fáil chun PENanna a imríonn móréifeachtaí ar an ngréasán agus ag a mbíonn iarmhairtí dearfacha a sheoladh, a mhéadú, a fhaireachán agus a fhothú. Tá an chéad sraith de PENanna (EIT Digital, EIT Climate-KIC agus EIT InnoEnergy) a seoladh in 2009, bunaithe go maith agus aibí agus déanfar a gcreat-chomhaontuithe comhpháirtíochta a fhoirceannadh tar éis 2024 i gcomhréir leis an uastréimhse deontais. Tá an dara agus an tríú glúin de PENanna (EIT Health agus EIT Raw Materials (2014), EIT Food (2016)) ag teacht in aibíocht. Chuaigh an dá PEN a ainmníodh i Nollaig 2018, EIT Urban Mobility agus EIT Manufacturing, i mbun oibríochtaí in 2019.

Faoi 2019, bhí breis agus 600 gnólacht, 250 institiúid ardoideachais, 200 eagraíocht taighde agus breis agus 50 eagraíocht agus údarás ón tsochaí shibhialta rannpháirteach sna hocht PEN EIT.

I bhfianaise na n-éagothromaíochtaí réigiúnacha leanúnacha i bhfeidhmíocht na nuálaíochta san Eoraip, sheol EIT Scéim Nuálaíochta Réigiúnach (SNR) in 2014 chun a fhor-rochtain réigiúnach a leathnú chuig tíortha ísealnuálaíochta agus meán-nuálaíochta. Trí bhíthin RIS, chuir EIT lena ghníomhaíochtaí ar fud na hEorpa agus cuireann sé deiseanna ar fáil anois do thíortha (agus do réigiúin sna tíortha sin) ina bhfuil feidhmíocht nuálaíochta íseal mar a shainíonn an Scórchlár Eorpach Nuálaíochta (EIS) í páirt a ghlacadh i ngníomhaíochtaí thriantán an eolais mar chuid de phobal PEN.

1.2 Na Príomhdhúshláin

Tá luas na nuálaíochta géaraithe go mór le deich mbliana anuas. Earnálacha eacnamaíochta a athmhúnlú, gnólachtaí atá ann cheana a shuaitheadh agus deiseanna nach bhfacthas a leithéid riamh a chruthú, sin an méid atá á dhéanamh de thoradh na nuálaíochta. De bhrí go bhfuil an t-ord eacnamaíoch domhanda ag síorathrú agus an iomaíocht idirnáisiúnta ag méadú tá an tAontas ag brath níos mó ar thallann agus tá a chumas chun dul i mbun nuálaíochta ag fás. Tá tábhacht níos mó ag baint le comhdhearadh, comhar agus comhchruthaitheacht idir disciplíní agus idir oideachas, cúrsaí gnó agus taighde anois ná mar a bhí riamh i ndáil le haghaidh a thabhairt ar dhúshláin dhomhanda a bhaineann leis an athrú aeráide, cailleadh na bithéagsúlachta, úsáid neamh-inbhuanaithe acmhainní nádúrtha, claochlú digiteach agus sóisialta, athruithe déimeagrafacha nó an bhail a bheidh ar chúram sláinte agus bia sa todhchaí.

Ar an gcéad dul síos, tá méadú ag teacht ar an méid a bhíonn geilleagair an lae inniu ag brath ar na scileanna agus ar na cumais atá ag daoine agus ag eagraíochtaí chun táirgí agus seirbhísí a dhéanamh dá smaointe. Is mór an difear a dhéanann scileanna nuálaíochta agus cultúr fiontraíochta sa lá atá inniu ann go háirithe i réimsí teicneolaíochta agus eolaíochta agus i ndisciplíní eile freisin. Tá géarghá le borradh eile a chur faoi chumas nuálaíochta institiúidí ardoideachais ar fud an Aontais. Is é EIT is fearr atá in ann an méid sin a chur i gcrích faoi chreat Fís Eorpach.

Ar an dara dul síos, tá an ghaireacht fhisiceach ar cheann de na tosca cumasúcháin a chuireann leis an nuálaíocht. Tionscnaimh atá dírithe ar ghréasáin nuálaíochta a fhorbairt agus ar sheirbhísí a chur ar fáil a bhfuil sé mar aidhm acu cuidiú le heolas a chruthú, a chomhroinnt agus a aistriú, tá ról lárnach ag na tionscnaimh sin maidir le hidirghníomhaíochtaí idir gnólachtaí, lucht léinn, eagraíochtaí taighde, rialtais agus daoine aonair a chur chun cinn. Mar sin féin, is mór an difríocht atá idir feidhmíochtaí taighde agus nuálaíochta ar fud an Aontais mar a léirítear sa Scórchlár Nuálaíochta Eorpach. Tá sé rithabhachtach go mbeidh an nuálaíocht cuimsitheach agus fréamhaithe sna críocha áitiúla. Is maith iad gníomhaíochtaí EIT chun rannchuidiú le héiceachórais nuálaíochta áitiúla, lena ngabhann toise láidir Eorpach, a neartú.

Ar deireadh, bíonn meascán d'eolas, bonneagar agus tallann de dhíth ar éiceachórais nuálaíochta bhríomhara. Ní mór creatdálaí maidir le comhar idir lucht taighde, oideachais agus nuálaíochta san Eoraip a bheith ann mar aon le sineirgí láidre chun a áirithiú go ndéanfar infheistiú iomchuí éifeachtúil sa taighde agus sa nuálaíocht. Maidir le neartú chomhtháthú thriantán an eolais trí PENanna, lena n-áirítear trí chomhpháirtithe nua a thabhairt isteach, is cinnte gur bealach deimhnithe é sin chun timpeallacht a chothú atá fabhrach don nuálaíocht agus is cuspóir treorach de chuid EIT é.

1. 3. Seasamh in Fís Eorpach

Leis an [togra maidir le Fís Eorpach] le haghaidh Clár Réime nua don taighde agus don nuálaíocht don tréimhse 2021-2027 thug an Coimisiún Eorpach gealltanas láidir cumas nuálaíochta na hEorpa a mhéadú a thuilleadh chun go mbeifear in ann freagairt ar dhúshláin na todhchaí. De bhrí go bhfuil EIT ina chuid de [Cholún na hEorpa Nuálaí] den [togra maidir le Fís Eorpach] atreisítear an ról ar leith atá aige i ndáil le nuálaíocht a chothú trí lucht gnó, lucht oideachais, lucht taighde, údarais phoiblí agus an tsochaí shibhialta a thabhairt le chéile. Léirítear sa [togra maidir le Fís Eorpach] uaillmhian mhéadaitheach an Aontais i dtaca leis an nuálaíocht agus an gá atá lena cur i gcrích.

Áiritheofar le próiseas Phleanáil Straitéiseach Fís Eorpach go mbeidh comhleanúnachas ann idir gníomhaíochtaí EIT agus an chuid eile de Fís Eorpach. Rannchuideoidh EIT leis an bpróiseas comhordaithe straitéisigh do Chomhpháirtíochtaí Eorpacha. Leanfaidh EIT de na héiceachórais nuálaíochta a chuidíonn le dul i ngleic le dúshlán dhomhanda a neartú trí chomhtháthú thriantán an eolais a chothú i réimsí téamacha gníomhaíochta na PENanna.

Beidh áit ríthábhachtach ag sineirgí láidre, lena n-áirítear an comhar ar leibhéal an rialachais, idir EIT agus an Chomhairle Nuálaíochta Eorpach (CNE), a mhéid a bhaineann leis an tionchar a bheidh ag Colún [na hEorpa Nuálaí]. Reáchtálfaidh EIT agus EIC gníomhaíochtaí comhlántacha arb é is aidhm leo an tacaíocht a thugtar d'fhiontair nuálacha a shruthlíniú, lena n-áirítear seirbhísí luasghéaraithe gnó agus cúrsaí oiliúna.

Féadfaidh EIC cuidiú le gnólachtaí nuathionscanta a fhaigheann tacaíocht ó PENanna a bhfuil acmhainn mhór mhéadaithe iontu forbairt thapa a dhéanamh. Go háirithe, féadfaidh na fiontair is nuálaí a fhaigheann tacaíocht ó PENanna, má roghnaítear iad faoi EIC, leas a bhaint as an tacaíocht a thairgeann ionstraimí luasaire EIC agus/nó as an tacaíocht airgeadais a thairgeann ionstraimí InvestEU. Ina theannta sin, déanfaidh EIT rochtain thairbhíthe EIC ar éiceachórais nuálaíochta PENanna agus ar ghníomhaithe ábharthathriantán an eolais a éascú a thuilleadh. Ar an gcaoi sin féadfaidh tairbhíthe EIC baint ghníomhach a bheith acu le gníomhaíochtaí PENanna agus tairbhe a bhaint as seirbhísí PENanna.

Áiritheoidh EIT comhleanúnachas le sraith éiceachóras nuálaíochta na hEorpa de Fís Eorpach. Go háirithe, glacfaidh EIT páirt ghníomhach i ngníomhaíochtaí Fhóram EIC agus déanfaidh sé naisc idir Pobal EIT agus gníomhaíochtaí ábhartha lena dtugtar tacaíocht d'éiceachórais nuálaíochta chun dubailt a sheachaint agus comhleanúnachas agus comhlántacht a áirithiú.

Áiritheoidh EIT sineirgí níos láidre le cláir agus tionscnaimh sa Cholún [Eolaíocht den Scoth], chun aistriú an eolais a thagann ó thaighde bunúsach ina fheidhmeanna nithiúla a luasghéarú, rud a rachaidh chun leasa na sochaí. Go háirithe, i dtaca le Gníomhaíochtaí Marie-Skłodowska-Curie, oibreoidh EIT i gcomhar chun scileanna nuálaíochta agus fiontraíochta chomhaltáí Gníomhaíochtaí Marie-Skłodowska-Curie a fhorbairt gach tráth dá ngairmréim.

Rannchuideoidh EIT leis an gColún [Dúshláin Dhomhanda agus Iomaíochas Tionsclaíoch Eorpach] agus comhlánóidh sé gníomhaíochtaí ábhartha chun dul i ngleic le dúshláin dhomhanda agus iomaíochas an Aontais a mhéadú ar scála domhanda. Go háirithe, trí bhíthin a PENanna, féachfaidh EIT le rannchuidiú le misin ábhartha agus le cnuasaigh théamacha agus le Comhpháirtíochtaí Eorpa e.g. trí thacú go suntasach le bearta atá dírithe ar thaobh an éilimh agus trí sheirbhísí saothraithe a chur ar fáil chun treisiú le haistriú teicneolaíochta agus chun tráchtálú na dtorthaí a bhaintear amach a luasghéarú.

Chomh maith leis sin, scrúdófar deiseanna sineirgíochta idir an chuid sin de Fís Eorpach dar cúram an rannpháirtíochta a leathnú agus an Limistéar Eorpach Taighde a neartú agus na gníomhaíochtaí for-rochtana a fhaigheann tacaíocht ó EIT. Go háirithe, féadfaidh sprioceintitis den chuid sin de Fís Eorpach dar cúram an rannpháirtíochta a leathnú agus an Limistéar Eorpach Taighde a neartú gearáil a dhéanamh maidir le saineolas agus tacaíocht EIT agus maidir le gníomhaíochtaí for-rochtana EIT.

2. CAIGHDEÁIN A ARDÚ: STRAITÉIS EIT IN 2021-2027

Le linn na tréimhse 2021-2027, leanfaidh EIT de bheith ag tacú leis na PENanna chun na héiceachórais nuálaíochta a chuidíonn le dul i ngleic le dúshláin dhomhanda a neartú, i sineirgíocht leis an gcuid eile de Fís Eorpach agus cláir eile de chuid an Aontais. Déanfaidh sé an méid sin trí chomhtháthú oideachais, taighde agus gnó a chothú agus ar an gcaoi sin timpeallachtaí atá fabhrach don nuálaíocht a fhorbairt, agus trí ghlúin nua fiontraithe a chur chun cinn agus tacú leo, trí chabhrú le bearna inscne na fiontraíochta a dhúnadh agus trí fhorbairt cuideachtaí nuálacha a spreagadh i sineirgíocht agus i gcomhlántacht le EIC. Ar an gcaoi sin, bunaithe ar na réimsí uileghabhálacha idirghabhála a shainítear sa [togra maidir le Fís Eorpach], déanfaidh EIT an méid seo a leanas go háirithe:

- (1) Éiceachórais nuálaíochta inbhuanaithe a neartú ar fud na hEorpa;
- (2) Scileanna fiontraíochta agus nuálaíochta a chothú san fhoghlaím ar feadh an tsaoil;
- (3) Réitigh nua ar dhúshláin dhomhanda a thabhairt chuig an margadh;
- (4) Sineirgí agus breisluach a áirithiú in Fís Eorpach.

2.1 Cuspóirí sonracha EIT

I gcomhréir leis na dúshláin shainaitheanta a bhfuil EIT ag tabhairt aghaidh orthu agus ar mhaithe le rannchuidiú leis na cuspóirí uileghabhálacha thuas arna sainiú do EIT sa [togra maidir le Fís Eorpach] is iad seo a leanas cuspóirí sonracha EIT don tréimhse 2021-2027:

- (a) Oscailteacht agus tionchar PENanna, mar aon le comhtháthú thriantáin an eolais, a mhéadú ar fud an Aontais;
- (b) Cumas fiontraíochta agus nuálaíochta na hearnála ardoideachais a mhéadú trí athrú institiúideach a chur chun cinn, agus tacú leis, in institiúidí ardoideachais agus iad a chomhtháthú sna héiceachórais nuálaíochta;
- (c) For-rochtain réigiúnach agus áitiúil EIT gona PENanna a mhéadú d'fhonn aghaidh a thabhairt ar éagothromaíochtaí sa chumas nuálaíochta agus chun feabhas a chur ar scaipeadh an eolais agus na nuálaíochta ar fud an Aontais.

Trí na cuspóirí sin a chur i gcrích, rannchuideoidh EIT le tionchair eolaíochta, eacnamaíochta/theicneolaíochta agus shochoíochta Fís Eorpach a bhaint amach go hiomlán.

3. BORRADH A CHUR FAOI THALLANN NUÁLAÍOCHTA AGUS FAOI CHUMAS NUÁLAÍOCHTA NA hEORPA: NA PRÍOMHGHNÍOMHAÍOCHTAÍ

Le straitéis EIT don tréimhse 2021-2007, díreofar ar ghníomhaíochtaí lena gcuirfidh EIT le luach ar leibhéal an Aontais agus lena rannchuideofar le cuspóirí Fís Eorpach a bhaint amach. Ar an gcéad dul síos, leanfaidh EIT de thacaíocht a thabhairt don chumas agus d'éiceachórais nuálaíochta trí bhíthin na PENanna, trína bhforbairt a thuilleadh, agus trí fháilte a chur roimh chomhpháirtithe nua agus a bheith sásta leathnú. Ar an dara dul síos, agus é ag tógáil ar a thaithí ar chomhtháthú thriantán an eolais, stiúrfaidh EIT tacaíocht agus forbairt an chumais fiontraíochta agus nuálaíochta in earnáil an ardoideachais, arna gcur chun feidhme trí na PENanna. Ar deireadh, trí bhíthin bearta cothrománacha níos éifeachtaí, féachfaidh EIT le háirithiú go méadófar a thionchar ar leibhéal an Aontais. Ina theannta sin cuirfidh EIT feabhas ar a oibríochtaí d'fhonn a éifeachtacht, a éifeachtúlacht agus a thionchar a mhéadú.

3.1. Tacaíocht do PENanna atá ann cheana

Déanfaidh EIT éiceachórais nuálaíochta a neartú trí leanúint de thacaíocht a thabhairt do na PENanna atá ann cheana chun aghaidh a thabhairt ar dhúshláin dhomhanda tríd an triantán eolais a chomhtháthú ar leibhéal an Aontais agus na mBallstát, agus ar an leibhéal réigiúnach agus áitiúil. D'fhoill an cúram sin a chur chun feidhme, beidh sciar mór de bhuiséad EIT le tiomnú chun tacú le PENanna, agus neartóidh EIT a thuilleadh a ardán féin chun PENanna a sheoladh, a fhás, a fhaire agus a fhothú. Áiríteoidh EIT go leanfaidh PENanna de bheith ag saothrú na hinbhuanaitheachta airgeadais d'fhoill an neamhspleáchas airgeadais ar dheontas EIT a bhaint amach tráth nach déanaí ná 15 bliana dá éis trí infheistíocht phoiblí agus phríobháideach a ghíaráil, agus béim á coimeád ag an am céanna ar chomhtháthú a dhéanamh ar ghníomhaíochtaí thriantán an eolais.

Áiríteoidh EIT go ndéanfaidh PENanna straitéis a fhorbairt agus a chur chun feidhme chun comhéadain, comhar agus sineirgí a chruthú le Comhpháirtíochtaí Eorpacha agus le misin ábhartha agus le EIC, agus le tionscnaimh agus cláir ábhartha eile de chuid an Aontais freisin. Seachas an tacaíocht airgeadais, bunaithe ar cheachtanna a foghlaimíodh, cuirfidh EIT maoirseacht straitéiseach ar fáil do PENanna, mar aon le treoir maidir le saincheisteanna cothrománacha agus saincheisteanna sonracha.

Déanfaidh EIT réimsí comhair tras-PEN a shainiú agus a chur chun cinn i ndáil le hábhair is ábhartha ó thaobh straitéise agus beartais de. Neartóidh EIT an comhordú idir PENanna i réimsí comhleasa, go háirithe, trí mhalartuithe taithí agus dea-chleachtas a chothú eatarthu, agus comhar (gníomhaíochtaí tras-PEN⁴) maidir le hábhair théamacha agus cothrománacha. I gcás ina dtugann roinnt PENanna aghaidh cheana féin ar thosaíochtaí coiteanna beartais de chuid an Aontais i gcás nach ann do PENanna tiomnaithe, is ag gníomhaíochtaí tras-PEN atá an cumas is airde. Tá poitéinseal ard ag baint leis na pobail PENanna éagsúla a thabhairt le chéile i ngníomhaíochtaí comhpháirteacha tiomnaithe comhleasa i dtaca le sineirgí agus spreagfaidh EIT na gníomhaíochtaí sin agus glacfaidh sé páirt ghníomhach i sainiú inneachar agus struchtúr ghníomhaíochtaí thras-PEN. Déanfaidh sé faireachán ar chur chun feidhme ghníomhaíochtaí thras-PEN agus ar na torthaí a bhainfear amach agus é mar aidhm aige cuid dhílis de straitéisí PENanna a dhéanamh de na gníomhaíochtaí sin. Ina theannta sin, éascóidh EIT bunú seirbhísí tras-PEN a bheidh dírithe ar chúraimí oibríochtúla a bheidh coiteann do na PENanna go léir a láimhseáil ar bhonn comhpháirteach.

⁴ Is éard atá sna gníomhaíochtaí tras-PEN na gníomhaíochtaí sin a bhfuil sé d'aidhm acu an comhar agus na sineirgí idir PENanna a fheabhsú, cur chuige níos idirdhisciplíní a chothú agus mais chriticiúil a chruthú i measc PENanna chun dul i ngleic le topaicí leasa choitinn.

3.2 Tionchar réigiúnach PENanna a mhéadú

Déanfaidh EIT a thionchar réigiúnach a mhéadú a thuilleadh trí bhíthin oscailteacht fheabhsaithe na PENanna i dtaca le réimse leathan de chomhpháirtithe agus geallsealbhóirí ionchasacha ar fud an Aontais agus trí straitéis réigiúnach níos láidre do PENanna, lena n-áirítear naisc leis na Straitéisí um Speisialtóireacht Chliste ábhartha. Áiríteoidh EIT go háirithe go mbeidh cur chuige cuimsitheach ag PENanna. Beidh sé de cheangal ar [...]PENanna straitéis a fhorbairt agus a chur chun feidhme ar mhaithe lena gcaidreamh le gníomhaithe nuálaíochta náisiúnta, réigiúnacha, agus áitiúla a neartú. Déanfaidh EIT faireachán gníomhach ar chur chun feidhme na straitéise sin. Beidh cur chuige "áitbhunaithe" le comhtháthú laistigh de straitéis agus plean gnó ilbhliantúil PENanna agus tógáil ar ionaid chomhlonnaithe PENanna (agus SNR) agus ar an gcaoi sin a ról mar thairseach chun rochtain a fháil ar phobal PEN a ghíaráil agus idirghníomhú lena gcomhpháirtithe comhlonnaithe, agus le gníomhaithe áitiúla nuálaíochta eile. Ba cheart do PENanna naisc a léiriú le Straitéisí um Speisialtóireacht Chliste, i gcás inarb ábhartha, agus le gníomhaíochtaí na n-ardán téamach ábhartha agus na dtionscnamh idir-réigiúnach, lena n-áirítear Údaráis Bhainistíochta na gCistí Struchtúracha agus Infheistíochta. Déanfaidh EIT faireachán freisin ar an dóigh a n-oibríonn ionaid chomhlonnaithe agus eintitis SNR agus ar an dóigh a gcomhtháthaíonn siad sna héiceachórais nuálaíochta áitiúla.

Áiritheoidh EIT go n-úsáidfear gníomhaíochtaí SNR EIT chun comhtháthú comhpháirtithe ionchasacha nua, a chuireann luach le PENanna, a mhealladh agus a éascú, rud a leathnóidh clúdach uile-Eorpach EIT, agus go mbeidh siad comhtháite i straitéisí ilbhliantúla PENanna.

Is ar bhonn deonach a ritheadh Scéim Nuálaíochta Réigiúnach EIT, arna stiúradh ag EIT agus arna cur chun feidhme ag na PENanna, go dtí seo. Ó 2021 amach, beidh gníomhaíochtaí EIT RIS sin ina gcuid dhílis de straitéis ilbhliantúil PEN. Leanfaidh EIT de threoir agus tacaíocht a chur ar fáil do PENanna chun straitéisí ilbhliantúla SNR EIT a ullmhú agus a chur chun feidhme. Leanfaidh na gníomhaíochtaí EIT RIS de thacú le cumas nuálaíochta na dtíortha (agus na réigiúin sna tíortha sin) a bhfuil feidhmíochtaí nuálaíochta measartha agus meánacha acu de réir an Scórchláir Eorpaigh Nuálaíochta⁵, chomh maith leis na Réigiúin is Forimeallaí, chun a lánpháirtiú i bpobail PENanna a chothú. Deich faoin gcéad, ar a laghad, agus 15% ar a mhéad, de bhuiséad foriomlán EIT lena dtugtar cistiú do PENanna reatha agus nua a bheidh sa bhuiséad EIT a thabharfar chun gníomhaíochtaí SNR EIT a chur chun feidhme.

Is é is aidhm do ghníomhaíochtaí dá dtabharfar tacaíocht trí bhíthin SNR:

- cumais nuálaíochta an éiceachórais áitiúil a fheabhsú, trí bhíthin gníomhaíochtaí forbartha cumais agus idirghníomhaíochtaí níos dlúithe idir na gníomhaithe nuálaíochta i dtriantáin an eolais áitiúil (e.g. cnuasaigh, gréasáin, údarais phoiblí, institiúidí ardoideachais, eagraíochtaí taighde, institiúidí gairmoiliúna, FBManna) gona ngníomhaíochtaí;
- tacú leis an gcuspóir comhpháirtithe nua sna PENanna a mhealladh agus éiceachórais nuálaíochta a nascadh le héiceachórais nuálaíochta uile-Eorpacha.

⁵ Don tréimhse 2021-2024, is iad na tíortha atá incháilithe do ghníomhaíochtaí EIT RIS na tíortha sin a shainaithnítear mar nuálaithe "measartha" nó "meánacha" i gceann amháin ar a laghad de thrí thuarascáil bhliantúla an Scórchláir Eorpaigh Nuálaíochta (EIS) a eisíodh in 2018, in 2019 agus in 2020. Don tréimhse 2021-2024, is iad na tíortha atá incháilithe do ghníomhaíochtaí EIT RIS na tíortha sin a shainaithnítear mar nuálaithe "measartha" nó "meánacha" i gceann amháin ar a laghad de thrí thuarascáil bhliantúla an Scórchláir Eorpaigh Nuálaíochta (EIS) a eisíodh in 2021, in 2022 agus in 2023.

3.3 *PENanna nua a sheoladh*

Ar mhaithe le rannchuidiú le haghaidh a thabhairt ar dhúshláin dhomhanda nua agus dúshláin dhomhanda atá ag teacht chun cinn, seolfaidh EIT glaonna chun PENanna nua a bhunú i réimsí téamacha roghnaithe a bhfuil tábhacht straitéiseach ag baint leo, ag tosú le PEN i réimse na nEarnálacha Cultúir agus Cruthaitheachta.

Leagtar amach, in Iarscríbhinn 1A a ghabhann leis an COSN seo, an réimse tosaíochta chun PEN[...] a sheoladh in 2023 mar aon le liosta na réimsí tosaíochta a d'fhéadfadh a bheith ann do dhara PEN nua in 2026.

Bunaithe ar thogra ó Bhord Rialaithe EIT agus ar anailís ar an togra sin moltar an chéad PEN i réimse na dTionscal Cultúrtha agus Cruthaitheach (CCI) a sheoladh in 2023 agus glao ar thograí a fhoilsiú in 2022. Is ag an réimse tosaíochta sin atá an chomhlántacht is láidre leis na hocht PEN atá seolta cheana ag EIT agus leis na réimsí tosaíochta féideartha i dtaca le Comhpháirtíochtaí Eorpacha eile a sheolfar faoi chlár réime Fís Eorpach. Tá bileog eolais ina bhfuil achoimre ar na dúshláin atá i réimse na CCInna agus ar an tionchar a mheastar a bheidh ag PEN ar áireamh in Iarscríbhinn 1B a ghabhann leis an COSN seo.

Bunaithe ar an mbuiséad arna mholadh do EIT d'fhéadfaí an dara PEN nua a sheoladh in 2026 agus glao a fhoilsiú in 2025. Chuige sin, déanfaidh an Coimisiún, faoi 2024, ábharthacht liosta na réimsí tosaíochta a d'fhéadfadh a bheith ann in Iarscríbhinn 1A a mheasúnú agus féadfaidh sé, i gcás inarb iomchuí, togra le haghaidh leasú ar Iarscríbhinn 1A agus Iarscríbhinn 1B a thíolacadh, agus rannchuidiú Bhord Rialaithe EIT á chur san áireamh chomh maith le próiseas pleanála straitéisí Fís Eorpach.

I gcás ina mbeadh buiséad de bhreis ar bhuiséad EIT ar fáil, d'fhéadfaí réimsí tosaíochta nua eile le haghaidh PENanna nua a d'fhéadfadh a bheith ann a shainiú i gcomhréir leis an nós imeachta thuas.

Na critéir chun PENanna nua a roghnú, déanfar iad a ailíniú leis na critéir a leagtar síos maidir le Comhpháirtíochtaí Eorpacha a roghnú arna sainiú in Iarscríbhinn III den [Rialachán maidir le Fís Eorpach], go háirithe oscailteacht, trédhearcacht, breisluach an Aontais, comhsheasmhacht agus sineirgí. Áireofar na critéir sin i nGlaao PEN ar thograí agus déanfar iad a mheasúnú le linn na meastóireachta. Tacóidh na PENanna nua freisin le tosaíochtaí beartais an Aontais a chur i gcrích amhail misin agus Spriocanna Forbartha Inbhuanaithe.

3.4. Tacú le cumas fiontraíochta agus nuálaíochta an ardoideachais

Déanfaidh EIT, i gcomhar leis an gCoimisiún, píolóta a dhearadh agus a sheoladh, chun tacú le forbairt an chumais nuálaíochta san ardoideachas, a chuirfear chun feidhme trí bhíthin na PENanna, ag tosú in 2021. Trí shamhail chomhtháthú thriantán an eolais, tá an bhearna fhadsheasmhach idir ardoideachas, taighde agus nuálaíocht á dúnadh ag EIT. Go háirithe, is uirlis rithábhachtach EIT le haghaidh an caipiteal daonna a fhorbairt trína fhócas ar leith ar oideachas fiontraíochta. Mar sin féin, caithfear tionchar EIT a leathnú a thuilleadh thar chomhpháirtithe na PENanna. Ní mór d'institiúidí ardoideachais ar fud na hEorpa a bheith nuálach agus fiontraíoch i dtaca lena gcur chuige maidir le hoideachas, taighde agus rannpháirtíocht le gnólachtaí agus an t-éiceachóras nuálaíochta áitiúil níos leithne, an tsochaí shibhialta san áireamh. Is féidir é sin a bhaint amach trí straitéis shoiléir, trí chreat modheolaíoch agus trí ghealltanas acmhainní.

Cuirfear gníomhaíochtaí chun feidhme ar bhealach oscailte, trédhearcach darb aidhm an cumas nuálaíochta san ardoideachas a mhéadú, trí dhíriú go príomha ar institiúidí ardoideachais nach comhpháirtithe PEN iad i slabhraí luacha agus in éiceachórais nuálaíochta ar fud an Aontais. Tabharfaidh na gníomhaíochtaí aghaidh go príomha ar fhorbairt cumais institiúidí ardoideachais lena n-áirítear *inter alia*: malartú agus cur chun feidhme dea-chleachtas maidir le comhtháthú thriantán an eolais (lena n-áirítear foghlaim eagraíochtúil, cóitseáil agus meantóireacht); pleananna gníomhaíochta a fhorbairt maidir le conas aghaidh a thabhairt ar riachtanais shainaitheanta i réimsí amhail bainistiú nuálaíochta, cruthú agus forbairt gnólachtaí nuathionscanta, aistriú teicneolaíochta lena n-áirítear bainistiú CMI, bainistiú daoine agus bainistiú eagraíochtúil agus rannpháirtíocht le geallsealbhoirí (áitiúla) agus leis an tsochaí shibhialta; pleananna gníomhaíochta maidir le forbairt an chumais nuálaíochta, agus obair leantach na bpleananna sin, a chur chun feidhme. Beidh gníomhaithe eile i dtriantán an eolais (e.g. eagraíochtaí VET, eagraíochtaí taighde agus teicneolaíochta (RTOanna), FBMananna agus gnólachtaí nuathionscanta) rannpháirteach sna gníomhaíochtaí sin agus comhlánóidh siad idirghabháil an EIT maidir le hoideachas mar chuid lárnach de ghníomhaíochtaí comhtháthaithe Triantáin Eolais na PENanna. Cuirfidh EIT comhar tras-PEN níos láidre chun cinn mar chuid den tionscnamh sin. Sna critéir incháilitheachta atá le háireamh sna glaonna, áireofar gur institiúidí ardoideachais atá lasmuigh de na PENanna a gheobhaidh tromlach an chistithe do gach tionscadal. Is é an aidhm atá ann go mbeidh tionchar ag EIT a rachaidh lasmuigh de na PENanna agus go gcuideoidh sé le misean lárnach an EIT borradh a chur faoi fhás eacnamaíoch inbhuanaithe agus iomaíochas trí chumas nuálaíochta na mBallstát a threisiú. Tá sé sin i gcomhréir le spriocanna Fís Eorpach maidir le scileanna fiontraíochta agus nuálaíochta a chothú i dtaca leis an bhfoghlaim ar feadh an tsaoil, lena n-áirítear cumais institiúidí ardoideachais ar fud na hEorpa a mhéadú.

Cuirfidh tacaíocht EIT freisin le tionscnaimh bheartais amhail cláir réime HEInnovate⁶ agus RIIA⁷ ar léir a luach ón méid a rinneadh i líon áirithe institiúidí ardoideachais agus Ballstát ar fud an Aontais. Déanfaidh EIT na gníomhaíochtaí tacaíochta a dhearadh i ndlúthchomhar leis an gCoimisiún agus áiritheoidh sé go mbeidh siad comhleanúnach agus comhlántach go hiomlán le gníomhaíochtaí ábhartha faoi Fís Eorpach, Erasmus agus cláir eile. Déanfar tuilleadh forbartha agus mionchoigeartaithe ar mhionsonraí sonracha an phróisis sásra cur chun feidhme agus seachadta sna chéad trí bliana agus beidh siad faoi réir faireacháin agus meastóireachta le linn chéim an treoirthionscadail. Saineolaithe seachtracha a dhéanfaidh an mheastóireacht ar an gcéim phíolótach agus cuirfear na torthaí in iúl do Ghrúpa Ionadaithe na mBallstát. Bunaithe ar thorthaí na meastóireachta sin, cinnfidh an Bord Rialaithe ar cheart leanúint leis an ngníomhaíocht, ar cheart í a uas-scálú nó ar cheart scor di.

Stiúrfaidh agus maoirseoidh Bord Rialaithe EIT cur chun feidhme agus faireacháin

ghníomhaíochtaí na PENanna. Tabharfar aird ar leith ar chur chuige oscailte agus cuimsitheach a áirithiú chun institiúidí ardoideachais lasmuigh de chomhpháirtithe na PENanna a mhealladh ar mhaithe le clúdach geografach leathan a bhaint amach; cur chuige idirdhisciplíneach agus idir earnálacha; agus nasc le Straitéisí ábhartha um Speisialtóireacht Chliste, agus le SNR EIT.

⁶ Is é atá in HEInnovate creat beartais a d'fhorbair an Coimisiún Eorpach agus OECD. Cuireann HEInnovate modheolaíocht ar fáil d'institiúidí ardoideachais chun réimsí cumais nuálaíochta a shainaithint ina bhféadfaí tuilleadh forbartha a dhéanamh agus chun straitéisí agus gníomhaíochtaí ábhartha a mhúnlú chun an tionchar inmhianaithe a bhaint amach. Tá HEInnovate bunaithe ar fhianaise mhodheolaíoch fhónta agus tá ocht réimse forbartha cumais ann: Ceannaireacht agus Rialachas; Claochlú Digiteach; Cumas Eagraíochtúil; Múineadh agus Foghlaim Fhiontraíoch; Fiontraithe a Ullmhú agus Tacú leo; Malartú Faisnéise; Idirnáisiúnú; agus Tionchar a Thomhas. Tá roinnt tuarascálacha tíre atá bunaithe ar HEInnovate foilsithe ag EFCE, féach an tsraith OECD Skills Studies (Staidéir Scileanna ECCE) ag <https://www.oecd-ilibrary.org/education/>

⁷ D'fhorbair an Coimisiún Eorpach an creat um an Measúnú Réigiúnach ar an Tionchar Nuálaíochta (RIIA) mar chéad chéim chun treoir a thabhairt maidir le measúnuithe ar thionchar nuálaíochta ollscoileanna trí chás-staidéir atá bunaithe ar mhéadracht a mhionsaothrú. D'fhéadfaí nasc a dhéanamh idir an tionchar nuálaíochta, e.g. trí chreat RIIA, agus ionstraimí cistiúcháin nuálaíochta feidhmíocht bhunaithe ar an leibhéal réigiúnach nó náisiúnta nó ar leibhéal an Aontais.

Déanfaidh EIT raon feidhme Lipéad EIT a neartú agus a leathnú lasmuigh de na PENanna chun na hinstitiúidí ardoideachais atá rannpháirteach sa ghníomhaíocht a áirithiú. Agus gníomhaithe ar fud thriantán an eolais a bheith rannpháirteach, féachfaidh EIT an tacaíocht a thugann sé le forbairt an chumais nuálaíochta san ardoideachas a nascadh le Lipéad EIT, lipéad a bhronntar faoi láthair ar chláir oideachais na PENanna. Go háirithe, féadfaidh institiúidí ardoideachais rannpháirteacha bheith bainteach le húsáid Lipéad EIT.

Déanfaidh EIT chomh maith leis sin Lipéad EIT a shíneadh chuig gníomhaíochtaí foghlama ar feadh an tsaoil a bhaineann le spriocghrúpa níos leithne mac léinn, foghlaimeoirí fásta agus institiúidí (lena n-áirítear institiúidí gairmoideachais) nach bhfuil sna PENanna agus ar gníomhaíochtaí iad lena ndéantar iarracht teagmháil a dhéanamh leis an spriocghrúpa sin. Le cur i bhfeidhm an Lipéid lasmuigh de phobal EIT, meastar go mbeidh toradh níos struchtúraithe ar gach leibhéal (an duine aonair, an clár, an institiúid). Déanfaidh EIT faireachán freisin ar dhámhachtain na Lipéad EIT do chláir oideachais agus oiliúna PENanna agus féachfaidh sé an bhféadfaí sásra dearbhaithe cáilíochta níos éifeachtaí a fháil, lena n-áirítear aitheantas agus creidiúnú seachtrach do Lipéad EIT.

Chun a áirithiú go mbeidh rath ar an ngníomhaíocht sin, cuirfidh EIT treoir, saineolas agus cóitseáil shonrach ar fáil d'institiúidí ardoideachais rannpháirteacha. Don ghníomhaíocht sin, díreoidh EIT ar institiúidí ardoideachais ó gach cearn den Eoraip ach tabharfar aird ar leith ar institiúidí ardoideachais i dtíortha (agus i réigiúin sna tíortha sin) ar nuálaithe measartha agus meánacha iad ar mian leo a gcumais nuálaíochta a fhorbairt agus a lorg nuálaíochta agus a Straitéisí um Speisialtóireacht Chliste a neartú.

3.5. Gníomhaíochtaí trasghearrtha EIT

3.5.1 Cumarsáid

Féachfaidh EIT le feabhas a chur ar a chumarsáid agus a infheictheacht i leith na bpríomh-gheallsealbhóirí sna Ballstáit agus áiritheoidh sé go mbeidh tacaíocht an Aontais infheicthe i gcomhréir leis an gcur chuige cumarsáide atá ag Fís Eorpach. De bhrí go bhfuil an líon PENanna ag méadú agus gurb ann do ghníomhaíocht nua a thacaíonn le forbairt fiontraíochta institiúidí ardoideachais cuirfidh EIT dlús lena chuid iarrachtaí an aithne atá air mar bhranda d'ardcháilíocht le haghaidh na nuálaíochta a mhéadú. Tá an chumarsáid fheabhsaithe sin ríthábhachtach ó thaobh na saoránach go háirithe toisc go gcuidíonn na nuálaíochtaí a thagann as EIT le léiriú a dhéanamh ar thionchar nithiúil infheistíochtaí an Aontais trí chlár réime an Aontais um thaighde agus um nuálaíocht.

Féachfaidh EIT leis an úsáid a bhaintear as gréasáin faisnéise an Aontais atá ann cheana a mhéadú agus comhordú a chur ar fáil dá ngníomhaíochtaí lena áirithiú go dtabharfar comhairle agus treoir níos fearr do chomhpháirtithe ionchasacha PENanna EIT. Ar mhaithe leis na deiseanna a chuireann EIT ar fáil a scaipeadh níos leithne agus tuiscint níos fearr a bheith orthu, déanfaidh EIT treoir agus cúnamh a threisiú i dtaca le tréithe a bhaineann le rannpháirtíocht in PENanna EIT ar fud na hEorpa trí fhorbairt a dhéanamh ar na gréasáin faisnéise agus na struchtúir atá ann cheana ar fud na hEorpa, go háirithe Pointí Teagmhála Náisiúnta Fís Eorpach. Déanfar bunú nithiúil Phointí Teagmhála Náisiúnta an EIT laistigh de struchtúr Fís Eorpach a chinneadh ar an leibhéal iomchuí i gcomhar leis an gCoimisiún. Lena áirithiú go mbeidh pobal mór geallsealbhóirí sa triantán eolais ar leibhéal náisiúnta, réigiúnach agus áitiúil san Aontas ar an eolas faoi ghlaonna agus tionscadail chistithe uile EIT (agus PENanna), cuirfear iad ar taispeáint chomh maith ar an Tairseach Eorpach um Dheiseanna Cistiúcháin agus Tairisceana faoi Fís Eorpach.

Eagróidh EIT cruinnithe rialta idir Grúpa Ionadaithe na mBallstát agus seirbhísí gaolmhara an Choimisiúin, faoi dhó sa bhliain ar a laghad, lena áirithiú go mbeidh cumarsáid agus sreabhadh faisnéise iomchuí ann do na Ballstáit agus ar leibhéal an Aontais. Coinneofar na Ballstáit ar an eolas go cuí faoi fheidhmíocht, faoi dhul chun cinn agus faoi ghníomhaíochtaí EIT agus PENanna. Ina theannta sin, tabharfaidh Grúpa Ionadaithe na mBallstát comhairle do EIT maidir le saincheistanna a bhfuil tábhacht straitéiseach ag baint leo. Áiritheoidh Grúpa Ionadaithe na mBallstát, freisin, in éineacht le EIT, go mbeidh tacaíocht iomchuí ann chun idirchaidreamh a dhéanamh le cláir nó tionscnaimh náisiúnta nó réigiúnacha agus chun sineirgí i ndáil le gníomhaíochtaí a fhaigheann tacaíocht ó EIT, a chothú leis na cláir agus na tionscnaimh sin, agus roinnfidh siad faisnéis faoin gcómhaoiniú náisiúnta agus/nó réigiúnach a d'fhéadfadh a bheith ann do na gníomhaíochtaí sin.

Méadóidh EIT a thuilleadh infheictheacht a ghníomhaíochta do shaoránaigh agus dá phobal geallsealbhóirí trí bhíthin Fhóram na nGeallsealbhóirí, Dámhachtana EIT agus Alumni EIT. Is é an aidhm atá ann na hidirghníomhaíochtaí a dhéantar le gníomhaithe Eorpacha sa triantán eolais a chur chun cinn agus aitheantas a thabhairt do na fiontraithe agus na nuálaithe san Eoraip is mó a bhfuil gealladh fúthu.

Leanfaidh EIT de Phobal Alumni EIT⁸ a stiúradh agus treoir straitéiseach a thabhairt dó (i gcomhar le Bord Alumni EIT) chun uasmhéadú a dhéanamh ar a thionchar fiontraíoch agus sochaíoch agus ar an mbaint leanúnach atá ag a chomhaltaí i ngníomhaíochtaí a fhaigheann tacaíocht ó EIT. Sa tréimhse 2021-2027 leanfaidh an Pobal de bheith ag fás agus cuimseofar ann na alumni a bheidh páirteach sna gníomhaíochtaí a thugann tacaíocht do chumais nuálaíochta na n-institiúidí ardoideachais.

3.5.2 Dea-chleachtais a aithint agus a chomhroinnt le geallsealbhóirí

Déanfaidh EIT an méid a fhoghlaimítear agus dea-chleachtais a thagann as gníomhaíochtaí a fhaigheann cistiú ó EIT a shainaithint, a chódú agus a chomhroinnt go héifeachtach agus oibreoidh siad le húdaráis Bhallstáit an Aontais ar an leibhéal náisiúnta agus réigiúnach araon agus leis an gCoimisiún, chun idirphlé struchtúrtha agus iarrachtaí comhordúcháin a bhunú, d'fhonn dea-chleachtais agus an méid a fhoghlaimítear a shainaithint, a roinnt agus a scaipeadh. Meastar go mbeidh na PENanna agus na tionscadail a thacaíonn le cumas nuálaíochta agus fiontraíochta na n-institiúidí ardoideachais ina bhfoinse luachmhar fianaise agus foghlama turgnamhaí do lucht déanta beartas i réimse an taighde, na nuálaíochta agus an oideachais, agus i réimsí téamacha éagsúla freisin.

Go dtí seo, ní dhearnadh na dea-chleachtais agus an méid a foghlaimíodh ó na PENanna a chódú go leordhóthanach agus a scaipeadh go héifeachtach. Déanfaidh EIT tuilleadh forbartha ar a ról mar institiúid nuálaíochta a bheidh in ann úsáid cleachtas nuálach, dea-fhoghlama agus torthaí gníomhaíochtaí arna gcistiú ag EIT (oideachas agus oiliúint, tacaíocht don nuálaíocht, tacaíocht don fhiontraíocht) a bhrath, a anailísiú, a chódú, a chomhroinnt agus a áirithiú ar scála níos leithne. Cuirfidh an ghníomhaíocht sin le naisc agus sineirgí leis na tionscnaimh eile atá laistigh de [Cholún na hEorpa Nuálaí] den [togra maidir le Fís Eorpach].

⁸ Tugtar le chéile i bPobal Alumni EIT fiontraithe agus gníomhaithe don athrú i gclár oideachais nó fiontraíochta arna chur ar fáil ag PEN. Líonra de bhreis agus 5000 comhalta atá sa Phobal.

3.5.3 Comhar idirnáisiúnta

Forbróidh EIT línte ginearálta comhair idirnáisiúnta do EIT agus do na PENanna faoi mhaoirseacht Bhord Rialaithe EIT, i gcomhréir le cur chuige Fís Eorpach maidir le comhar idirnáisiúnta agus le beartais eile ábhartha den Aontas, agus i gcomhairle le seirbhísí ábhartha an Choimisiúin. Faoi chuimsiú raon feidhme Rialachán EIT, féachfaidh EIT le tionchar a ghníomhaíochtaí a mhéadú trí bhíthin comhar idirnáisiúnta agus déanfaidh sé comhordú ar ghníomhaíochtaí idirnáisiúnta na PENanna arna gcistiú ag EIT. Díreoidh sé go dlúth ar chuspóirí beartais ábhartha an Aontais Eorpaigh agus ar thosaíochtaí taighde agus nuálaíochta agus ar an mbreisluach Eorpach a áirithiú. Ó thaobh an chomhair idirnáisiúnta de, díreoidh EIT, i gcomhairle leis an gCoimisiún, ar dhul i ngleic go héifeachtach le dúshlán dhomhanda, ar rannchuidiú le tionscadail idirnáisiúnta ábhartha agus leis na Spriocanna Forbartha Inbhuanaithe, ar rochtain ar thallann agus ar éileamh agus soláthar níos fearr ar réitigh nuálacha a áirithiú.

3.6. É a chur ag obair: An modh oibríochta

Sa roinn seo tá roinnt beart arb é is aidhm dóibh feidhmiú reatha EIT agus na PENanna a oiriúnú agus a fheabhsú. Déanfaidh Bord Rialaithe EIT éifeachtach, cumhachtaithe, straitéiseach faireachán ar chur chun feidhme na mbeart sin ar leibhéal EIT agus cuirfidh sé ar fáil na dreasachtaí agus an rialú is gá, lena n-áirítear tríd an bpróiseas leithdháilte cistiúcháin feidhmíochtbhunaithe, lena áirithiú go gcuirfidh na PENanna chun feidhme iad.

3.6.1. Samhail oibríochtúil PEN

Áiritheoidh EIT go mbeidh cur chun feidhme na PENanna i gcomhréir go hiomlán leis na ceanglais faoi seach a thagann as an Rialachán maidir le Fís Eorpach, lena n-áirítear a áirithiú go n-aistreoidh na hocht PEN atá ann cheana ó thaobh critéir chur chun feidhme Fís Eorpach le haghaidh Comhpháirtíochtaí Eorpacha a chur i gcrích. Dá bhrí sin, cuirfidh EIT treoir oibríochtúil threisithe ar fáil do na PENanna agus déanfaidh sé faireachán leanúnach ar fheidhmíocht na PENanna i gcomhréir le prionsabail na bainistíochta fóna, an fhaireacháin agus na meastóireachta a leagtar síos sa Rialachán maidir le EIT, agus leis na prionsabail agus na critéir a leagtar amach do Chomhpháirtíochtaí Eorpacha sa Rialachán maidir le Fís Eorpach agus ailíniú le tosaíochtaí agus táscairí Fís Eorpach chun a bhfeidhmiú agus a dtionchar a uasmhéadú. Déanfar bearta ceartaitheacha iomchuí i gcás thearcfheidhmíocht PEN, i gcás ina soláthróidh sé torthaí neamhleora nó i gcás easpa breisluacha Eorpaigh.

Áiritheoidh EIT go gcuirfear feabhas ar oscailteacht leanúnach na PENanna, go háirithe trína áirithiú go gcuirfidh na PENanna critéir aontachais a bheidh comhleanúnach, soiléir agus trédhearcach i bhfeidhm do chomhaltaí nua a chuireann le breisluach na gcomhpháirtíochtaí, agus trí fhorálacha eile freisin amhail nósanna imeachta trédhearcacha chun a bpleananna gnó a ullmhú agus trí fhaireachán córasach a dhéanamh ar gníomhaíochtaí PENanna.

Reáchtálfaidh PENanna a ngníomhaíochtaí freisin ar bhealach atá go hiomlán trédhearcach agus leanfaidh siad de bheith ina gcomhpháirtíochtaí oscailte dinimiciúla ar féidir le comhpháirtithe nua, ar fud an Aontais, sciar méadaitheach de FBManna san áireamh, a chuireann le breisluach na comhpháirtíochta, dul isteach iontu ar bhonn barr feabhais agus ábharthacht nuálaíochta. Chun go ndéanfar comhchruinniú cistiúcháin a theorannú agus go n-áiríteofar go mbainfidh gníomhaíochtaí PENanna tairbhe as líonra mór comhpháirtithe, beidh an nós imeachta le haghaidh Plean Gnó (lena n-áirítear na tosaíochtaí a shainaitheann, gníomhaíochtaí a roghnú agus cistí a leithdháileadh) a ullmhú agus le haghaidh cinntí cistiúcháin gaolmhara níos trédhearcaí agus níos cuimsithí.

Tabharfaidh straitéisí ilbhliantúla PENanna aghaidh ar leathnú na comhpháirtíochta, lena n-áirítear ionaid nua chomhlonnaithe a bhunú a leithdháilfidh Bord Rialaithe EIT buiséad leordhóthanach ina leith. Agus cinneadh á dhéanamh maidir le cistiú, cuirfidh an Bord Rialaithe san áireamh an dul chun cinn i dtreo na spriocanna arna léiriú sna straitéisí ilbhliantúla, *inter alia*, líon na n-ionad comhlonnaithe. Méadóidh PENanna oscailteacht na nglanna, go háirithe i dtaca le tionscadail a bheidh oscailte do thríú páirtithe. Cuirfidh na bearta sin uile le líon na n-eintiteas rannpháirteach a bheidh rannpháirteach i ngníomhaíochtaí PENanna. Ar deireadh, ina dtuairisciú rialta, ba cheart do PENanna tuairisciú maidir le rannpháirtíocht comhpháirtithe nua mar cheann de ghnéithe a gcistiúcháin feidhmíocht bhunaithe.

Ós rud é go mbíonn PENanna ag feidhmiú thar shlabhra luacha uile na nuálaíochta, áiritheoidh EIT cothromaíocht iomchuí idir gníomhaíochtaí oideachais, fiontraíochta agus nuálaíochta i bPleananna Gnó na PENanna agus go gcuirfear oibríochtaí na PENanna chun feidhme trí struchtúr éadrom atá éifeachtúil ó thaobh costais de a choinneoidh costais riaracháin agus bhainistíochta chomh híseal agus is féidir. Áiritheoidh EIT go mbeidh a dtionchair ionchasacha ag PENanna trí bhíthin réimse leathan gníomhaíochtaí arna sainaitheint i bPleananna Gnó PENanna, a thacaíonn go héifeachtach lena gcuspóirí a chomhlíonadh lena n-áirítear tionchar ionchasach ar éiceachórais nuálaíochta ar an leibhéal áitiúil, réigiúnach, náisiúnta agus ar leibhéal an Aontais. Áiritheofar gealltanais ó gach comhpháirtí PEN le linn thréimhse chonarthaigh an tionscnaimh trí fhaireachán rialta a dhéanamh ar ranníocaíochtaí an chomhpháirtí iarbhír le hais na ngealltanais tosaigh. Áiritheoidh EIT go mbeidh córas bainistithe riosca i bhfeidhm ag PENanna i gcás nach bhfuil comhpháirtithe áirithe in ann seasamh lena gcuid gealltanais tosaigh.

3.6.2. Samhail cistiúcháin PEN

Trí bhíthin samhail cistiúcháin shimplithe chuíchóirithe, táthar ag súil go gcuirfidh EIT feabhas ar thionchar na PENanna agus ar rannchuidiú na PENanna i dtaca le cuspóirí EIT agus an Chláir Fís Eorpach a bhaint amach agus dreasóidh sé gealltanais na gcomhpháirtithe PEN freisin. Déanfaidh EIT a shamhail chistiúcháin a oiriúnú chun breisluach a thacaíochta a mhéadú. Tá ceithre phríomhréimse ann ina gcuirfidh EIT feabhsúcháin chun feidhme.

Ar an gcéad dul síos, déanfaidh EIT a ráta cistiúcháin do ghníomhaíochtaí breisluacha PENanna a laghdú de réir a chéile chun leibhéal na n-infheistíochtaí príobháideacha agus poiblí a mhéadú. Táthar ag súil go gcuideoidh oiriúnú na samhla cistiúcháin leis na PENanna aistriú chuig inbhuanaitheacht airgeadais. Táthar ag súil go ndreasóidh sé iad chun laghdú de réir a chéile a dhéanamh le linn thréimhse na gcreat-chomhaontuithe comhpháirtíochta ar an sciar de chistiúchán EIT ina bPlean Gnó agus san am céanna an leibhéal comhinfeistíochta ó fhoinsí neamh-EIT a mhéadú. An laghdú a dhéanfar ar rátaí cistiúcháin EIT do ghníomhaíochtaí breisluacha PENanna, beidh feidhm aige maidir le gach céim de shaolré iomlán na PENanna (céim thionscnaimh, borradh, aibíocht, imeacht ó dheontas EIT) mar a leagtar amach thíos.

	Céim thionscnaimh	Borradh	Aibíocht	Imeacht ó dheontas EIT
Blianta	1 - 4	5 – 7	8 – 11	12 - 15
Ráta cistiúcháin EIT	Suas le 100 %	Suas le 80 %	Suas le 70 %	Suas le 50 % ag bliain 12, laghdú 10 % in aghaidh na bliana

Figiúr 4: Rátaí Comhchistiúcháin EIT 2021-2027

Ar an dara dul síos, áiritheoidh EIT gur de réir samhail chistiúcháin fheidhmíochtbhunaithe a bheidh an próiseas leithdháilte deontais. Bainfear úsáid níos mó as deontais ilbhliantúla. Beidh cistiú EIT nasctha go dlúth le dul chun cinn a dhéanfar sna réimsí a shainítear in Airteagail 10 agus 11(2) den Rialachán maidir le EIT agus le cuspóirí na PENanna mar a leagtar amach ina bpleananna gnó agus d'fhéadfaí é a laghdú, a mhodhnú nó deireadh a chur leis i gcás easpa torthaí. Cuirfidh EIT, *inter alia*, dreasachtaí níos láidre ar fáil do PENanna agus chun go ndéanfaidh siad a ndícheall comhpháirtithe nua a fháil agus chun go ndéanfaidh siad bearta ceartaitheacha freisin go háirithe bunaithe ar a bhfeidhmíocht aonair chun an leibhéal tionchair is airde a áirithiú.

Ar an tríú dul síos, cuirfidh EIT rialacha diana i bhfeidhm maidir leis an sásra athbhreithnithe a threisiú roimh dhul in éag na chéad thréimhse tosaigh 7 mbliana d'oibríochtaí na PENanna i gcomhréir le hAirteagail 10 agus 11 den Rialachán maidir le EIT.

Ba cheart an measúnú sin, atá le déanamh le cabhair ó shaineolaithe seachtracha, a bheith i gcomhréir leis an dea-chleachtas idirnáisiúnta is fearr agus i gcomhréir leis na critéir faireacháin agus mheastóireachta a leagtar amach do Chomhpháirtíochtaí Eorpacha sa Rialachán maidir le Fís Eorpach. Déanfar an measúnú sin roimh dhul in éag na thréimhse tosaigh seacht mbliana. Mar thoradh ar an measúnú sin déanfaidh an Bord Rialaithe cinneadh leanúint den ranníocaíocht airgeadais le PEN, é a mhodhnú nó gan leanúint de, (agus ar an gcaoi sin gan síneadh ama a chur leis an gcreat-chomhaontú comhpháirtíochta leis an PEN sin) agus na hacmhainní a ath-leithdháileadh ar ghníomhaíochtaí atá ag feidhmiú níos fearr. Iarrfaidh an Bord Rialaithe tuairim ó Ghrúpa Ionadaithe na mBallstát sula ndéanfaidh siad an cinneadh sin.

Ar deireadh, leanfaidh EIT dá iarrachtaí maidir le simpliú chun ualach riaracháin neamhriachtanach⁹ ar an PEN a mhaolú, rud a fhágfadh go bhféadfaí a Phlean Gnó bliantúil agus a straitéis ilbhliantúil a chur chun feidhme ar bhealach solúbtha éifeachtúil. Féadfar úsáid a bhaint as cnapshuim nó costais aonaid ar ghníomhaíochtaí ábhartha PEN sa mhéid sin. Thairis sin, chun pleanáil níos fearr a dhéanamh i dtaca leis na hacmhainní, gníomhaíochtaí nuálaíochta go háirithe, agus chun tiomantas níos láidre agus infheistíocht fhadtéarmach ó chomhpháirtithe atá rannpháirteach i ngníomhaíochta PENanna a éascú, síneoidh EIT comhaontuithe deontais ilbhliantúla le PENanna lena n-áirítear forálacha le haghaidh cistiú feidhmíocht bhunaithe, i gcás inarb iomchuí, faoi réir na gcreat-chomhaontuithe comhpháirtíochta ábhartha. Ba cheart nach rachadh na comhaontuithe deontais ilbhliantúla sin thar thréimhse 3 bliana.

⁹ Go háirithe, chuirfí deireadh leis an tuairisciú bliantúil ar ghníomhaíochtaí comhlántacha PEN, mar a mhol Cúirt Iniúchóirí na hEorpa i dTuarascáil Speisialta uaithe in 2016 (Moladh 1, lch. 51).

3.6.3 Caidreamh EIT le PENanna tar éis fhoirceannadh an chreat-chomhaontaithe comhpháirtíochta

Déanfaidh EIT na prionsabail ghinearálta a fhorbairt le haghaidh an chaidrimh le PENanna tar éis fhoirceannadh an chreat-chomhaontaithe i gcomhréir le creat Fís Eorpach le haghaidh Comhpháirtíochtaí Eorpacha. Faoi réir staidéar chuimsitheach neamhspleách i ndlúthchomhar leis an gCoimisiún, faoi dheireadh 2023, saineoidh EIT an creat foriomlán dá chaidreamh leis na PENanna a mbeidh an creat-chomhaontú comhpháirtíochta foirceanta ina leith le linn na clárthréimhse 2021-2027. Bunaithe ar an gcreat foriomlán agus faoi réir toradh dearfach ar athbhreithniú deiridh, féadfaidh EIT "Meabhrán Comhair" a thabhairt i gcrích le PEN agus é mar aidhm aige comhar gníomhach a choinneáil leis tar éis fhoirceannadh an chreat-chomhaontaithe comhpháirtíochta. Sa Mheabhrán sin, áireofar na nithe seo a leanas, *inter alia*:

- cearta agus oibleagáidí a bhaineann le leanúint de ghníomhaíochtaí thriantán an eolais chomh maith le héiceachóras agus líonra an PEN a chothabháil, le húsáid bhranda EIT, le rannpháirtíocht i nDámhachtana EIT agus i dtionscnaimh eile arna n-eagrú ag EIT; úsáid Lipéad EIT le haghaidh cláir oideachais agus oiliúna; agus caidreamh le Pobal Alumni EIT;
- coinníollacha le haghaidh rannpháirtíochta i nglaonna iomaíocha EIT le haghaidh roinnt gníomhaíochtaí sonracha, i gcás inarb ábhartha, e.g. gníomhaíochtaí tras-PEN. Cuirfidh Bord Rialaithe EIT san áireamh, go háirithe, an staidéar cuimsitheach neamhspleách agus na cineálacha gníomhaíochtaí a bhfuil tacaíocht le tabhairt dóibh trí ghlaonna iomaíocha á sainiú.

3.7. Sineirgí agus comhlántachtaí le cláir eile

Ag tógáil dó ar a raon leathan gníomhaíochta agus a ról ar leith, is maith is féidir le EIT sineirgí a chruthú agus comhlántachtaí a sholáthar, agus dubailtí á seachaint aige, le cláir nó le hionstraimí eile de chuid an Aontais, lena n-áirítear trína thacaíocht do PENanna ina gcuid gníomhaíochtaí pleanála agus cur chun feidhme a neartú. Ar an liosta thíos tá samplaí nithiúla ina bhfuiltear ag súil go rannchuideoidh EIT le sineirgí idir an meántearma agus an fadtearma lasmuigh de Fís Eorpach.

Erasmus

- Bunóidh EIT agus Erasmus sineirgí idir a bpobail faoi seach. Leis an gcomhar díreofar ar rochtain ar scoileanna samhraidh PENanna a áirithiú do mhic léinn Erasmus a bhíonn rannpháirteach in institiúidí ardoideachais ar comhpháirtithe PEN iad nó ar ghníomhaíochtaí oiliúna ábhartha eile (mar shampla, fiontraíocht nó bainistíocht nuálaíochta) agus ar theagmhálacha a bhunú le líonra alumni na PENanna.
- Oiliúint d'fhoirne acadúla (ó na hinstitiúidí ardoideachais uile, lasmuigh de na PENanna) i dtaca le curaclaim faoina gcomhtháthaítear an fhiontraíocht agus an nuálaíocht, arna déanamh ag EIT/PENanna, agus cleachtais nuálacha arna bhforbairt ag PENanna faoi ghréasáin Erasmus (amhail na Comhghuaillíochtaí Eolais idir institiúidí ardoideachais agus gnólachtaí) a thástáil, a ghlacadh agus a mhéadú agus a mhalairt sin, is féidir an méid sin a chuimsiú faoi ghníomhaíochtaí comhair freisin.
- Ní mór sineirgí a áirithiú, i gcás inar féidir, le Tionscnamh na nOllscoileanna Eorpacha a d'fhéadfadh a bheith ina chuidiú chun gníomhaíochtaí oideachasúla EIT a phríomhshruthú chun go mbeidh tionchar sistéamach acu.

An Clár don Eoraip Dhigiteach (CED)

- Comhoibreoidh na PENanna leis na Moil Nuálaíochta Digití Eorpacha chun tacú le claochlú digiteach na tionsclaíochta agus na n-eagraíochtaí san earnáil phoiblí.
- Scrúdófar a indéanta atá sé úsáid a bhaint as bonneagair agus acmhainní a forbraíodh faoin gClár don Eoraip Dhigiteach (e.g. acmhainní sonraí agus leabharlanna d'algartaim intleachta saorga; ionaid cumais ríomhaireachta ardfeidhmíochta sna Ballstáit) i réimsí an oideachais agus na hoiliúna ag na PENanna, agus ar mhaithe le cuspóirí tástála agus taispeána i dtionscadail nuálaíochta.

Cistí an Bheartais Comhtháthaithe (go háirithe Ciste Forbraíochta Réigiúnaí na hEorpa agus Ciste Sóisialta na hEorpa)

- Trína n-ionaid chomhlonnaithe agus a n-eintitis SNR, cuirfidh PENanna EIT comhar réigiúnach agus trasréigiúnach chun cinn idir gníomhaithe thriantán an eolais (oideachas, taighde agus gnó) agus údaráis bhainistíochta i sineirgí le comhar agus infheistíochtaí idir-réigiúnacha ar fud slabhraí luacha i réimsí tosaíochta speisialaithe cliste gaolmhara, agus obair na n-ardán téamach um speisialtóireachta cliste. Féachfaidh EIT freisin ar rannchuidiú le tionscnaimh forbartha scileanna faoi Chistí an Bheartais Comhtháthaithe trí dhea-chleachtais a mhalartú.
- Cuirfidh EIT, i gcás inarb ábhartha, comhar leis na hArdáin um Speisialtóireacht Chliste agus na PENanna chun cinn, chun sineirgí idir acmhainní EIT, Cistí an Bheartais Comhtháthaithe agus cláir Eorpacha, náisiúnta agus/nó réigiúnacha eile a éascú.

InvestEU

- Iarrfaidh PENanna EIT comhar ar Mhol Comhairleach InvestEU chun tacaíocht agus cúnamh teicniúil a chur ar fáil d'fhiontair a fhaigheann tacaíocht ó PENanna i dtaca le tionscadail a ullmhú, a fhorbairt agus a chur chun feidhme.
- Déanfaidh PENanna EIT a ndícheall Tairseach InvestEU a fhothú chun infheisteoirí agus idirghabhálaithe airgeadais a thabhairt níos gaire d'fhiontair a fhaigheann tacaíocht ó PENanna, i ndlúthchomhar le seirbhísí an Choimisiúin agus i sineirge le CNE.

Eoraip na Cruthaitheachta

- Beidh clár nua Eoraip na Cruthaitheachta ábhartha i ndáil le gníomhaíochtaí PEN a dhéanfar amach anseo i réimse na ECCanna, i measc nithe eile. Déanfar sineirgí agus comhlántachtaí láidre a fhorbairt leis an gclár i réimsí amhail scileanna, poist agus samhlacha gnó cruthaitheacha.

Clár an Mhargaidh Aonair (Clár le haghaidh Iomaíochais Fiontar agus FBManna)

- Iarrfaidh PENanna comhar ar an Líonra Fiontar Eorpach (EEN) agus a Ghrúpaí Earnála chun comhar gnólacht le gnólacht, aistriú teicneolaíochta agus comhpháirtíochtaí nuálaíochta a éascú d'fhiontraithe ar mian leo a ngníomhaíochtaí a fhorbairt ar fud an Aontais agus lasmuigh de. Cuirfidh eagraíochtaí EEN gníomhaíochtaí PENanna EIT chun cinn i measc a gcliant ar FBM iad. Déanfaidh EIT comhar leis na cláir shoghluaisteachta le haghaidh fiontraithe nua i ndáil le feabhas a chur ar a scileanna fiontraíochta.

4. ACMHAINNÍ

4.1. Riachtanais bhuiséadacha

Is é EUR [3000] milliún a bheidh ag teastáil chun freastal ar riachtanais bhuiséadacha EIT sa tréimhse 2021-2027 agus tá siad sin bunaithe ar an dá phríomhchuid seo a leanas: 1) an caiteachas do na hocht PEN atá ann faoi láthair (meabhraítear i gcás trí cinn díobh go rachaidh na creat-chomhaontuithe comhpháirtíochta in éag faoi 2024) agus do sheoladh dhá PEN nua (in 2023 agus in 2026); agus 2) caiteachas riaracháin.

Tá sé beartaithe tuairim agus EUR [2920] milliún (97% de bhuiséad iomlán EIT) a chur ar fáil chun PENanna atá ann cheana agus PENanna nua a chistiú:

- agus cuirfear ar a laghad 10%, agus 15% ar a mhéad, i leataobh don Scéim Nuálaíochta Réigiúnach;
- cuirfear 7% ar a mhéad i leataobh do ghníomhaíochtaí tras-KIC, lena n-áirítear glaonna iomaíocha a dhírítear ar PENanna a bhfuil an creat-chomhaontú comhpháirtíochta foirceanta ina leith;
- cuirfear 7% ar a mhéad i leataobh do scéim phiolótach chun cuidiú le cumas fiontraíochta agus nuálaíochta na n-institiúidí ardoideachais a fhorbairt.

Trí ráta cistiúcháin EIT ar a dtiocfaidh laghdú de réir a chéile a thabhairt isteach, meastar go gcuirfidh na PENanna EUR [1500] milliún sa bhreis ar fáil ó fhoinsí príobháideacha agus poiblí eile. Tuairim agus EUR [300] milliún a bheidh sa bhuiséad le haghaidh dhá PEN nua a bheidh le seoladh (in 2023 agus 2026 faoi seach). I gcás ina mbeadh buiséad de bhreis ar bhuiséad EIT ar fáil d'fhéadfadh EIT tuilleadh PENanna a sheoladh freisin.

Leanfaidh EIT de bheith ina eagraíocht chuíchóirithe dhinimiciúil. Tiocfaidh méadú ar na costais a bhaineann le caiteachas riaracháin, costais lena gcumhdaítear an fhoireann is gá agus costais riaracháin, bhonneagair agus oibriúcháin, ach ní rachaidh siad thar 3% de bhuiséad EIT ar an meán. Cumhdóidh an Ungáir cuid den chaiteachas riaracháin trí spás oifige a chur ar fáil saor in aisce go dtí deireadh 2029. Ar an mbonn sin, tuairim agus EUR [80] milliún a bheidh ar chaiteachas riaracháin do 2021-2027.

4.2. Tionchar (faireachán agus meastóireacht)

Meastar go dtiocfaidh feabhas leanúnach ar thomhas thionchar EIT le linn an chéad chlárthréimhse eile agus cuirfear san áireamh na ceachtanna a fhoghlaimíofar agus an taithí a gheofar. Cuirfidh EIT creat meastóireachta, tuairiscithe agus faireacháin i bhfeidhm i gcomhréir le hAirteagail 10, 11 agus 19 de Rialachán EIT lena n-áiríteofar comhleanúnachas leis an gcur chuige foriomlán a glacadh maidir le Fís Eorpach agus ag an am céanna, freastal ar an tsolúbthacht. Go háirithe, cuirfear feabhas ar lúba aiseolais idir an Coimisiún, EIT agus PENanna chun aghaidh a thabhairt ar na cuspóirí ar bhealach comhsheasmhach comhleanúnach éifeachtúil.

4.2.1. *Tuairisciú agus Faireachán*

Cuirfidh EIT feabhas ar a chórais faireacháin agus tabharfaidh sé isteach creat tuairiscithe agus faireacháin lena n-áirítear táscairí tionchair, a bheidh ailínithe le Príomhchonairí Tionchair an [chláir Fís Eorpach]. Beidh an tuairisciú agus an faireachán ar fheidhmíocht oibríochtúil na PENanna agus a dtorthaí ina bpríomhchúram ar EIT agus cuirfear chun feidhme iad i gcomhar le seirbhísí corparáideacha coiteanna Fís Eorpach. Beidh an córas tuairiscithe agus faireacháin do na PENanna ina dhlúthchuid de chóras faireacháin foriomlán Fís Eorpach, go háirithe trí shamhlacha comhchoiteanna sonraí, lena n-áirítear bailiú sonraí a stórálfar i mbunachar sonraí coiteann, a chur chun feidhme. Glacfaidh an Coimisiún páirt i gcomhdhearadh gach táscaire tionchair agus faireacháin ábhartha arna fhorbairt agus arna chur i bhfeidhm ag EIT d'fhonn comhoiriúnacht agus comhsheasmhacht le córas faireacháin foriomlán Fís Eorpach a áirithiú, lena n-áirítear na príomhchonairí tionchair, an creat critéar do Chomhpháirtíochtaí Eorpacha agus don Phróiseas Pleanála Straitéisí. Déanfar faireachán leanúnach a bhunú le cinneadh ón mBord Rialaithe, chomh maith le nósanna imeachta athbhreithniúcháin eatramhaigh agus measúnaithe, lena n-áirítear chun tacar fóna táscairí cainníochtúla agus cáilíochtúla agus a mbonnlíne agus spriocanna gaolmhara. Anuas air sin, cuirfidh EIT san áireamh cur in úsáid mhodheolaíocht an Radair Nuálaíochta in Fís Eorpach, agus fiosróidh sé conas a d'fhéadfadh na PENanna breis acmhainne a bhaint as an Radar Nuálaíochta chun feabhas a chur ar a chuid gníomhaíochtaí faireacháin.

Tabharfar torthaí an fhaireacháin sin san áireamh i bpróisis pleanála gnó na PENanna agus cinnfear leo leithdháileadh chistiú feidhmíocht bhunaithe EIT ar ghníomhaíochtaí na PENanna agus ullmhú na gcreat-chomhaontuithe comhpháirtíochta agus comhaontuithe deontais arb iad na PENanna a dtairbhíthe. Ina theannta sin, tabharfar torthaí an fhaireacháin ar na PENanna san áireamh sa phróiseas um chomhordú straitéiseach do na Comhpháirtíochtaí Eorpacha.

Meastar go mbeidh na tionchair seo a leanas ag gníomhaíochtaí EIT, gníomhaíochtaí arna mbainistiú trí PENanna san áireamh:

- (1) *tionchar teicneolaíoch/eacnamaíoch/nuálaíochta* trí dhul i gcion ar fhorbairt agus fás cuideachtaí, agus trí réitigh nuálacha a fhorbairt chun aghaidh a thabhairt ar dhúshláin dhomhanda, trí phoist dhíreacha agus indíreacha a chruthú agus trí infheistíochtaí poiblí agus príobháideacha eile a chur ar fáil;

- (2) *tionchar eolaíoch agus oideachasúil* tríd an gcaipiteal daonna a neartú i dtaighde agus i nuálaíocht, trí scileanna nuálaíochta agus fiontraíochta a fheabhsú ar leibhéil aonair agus eagraíochtúla agus trí chraobhscaoileadh oscailte an eolais agus na nuálaíochta sa tsochaí a chothú;
- (3) *tionchar sochaíoch* trí aghaidh a thabhairt ar thosaíochtaí beartais an Aontais i réimsí an athraithe aeráide, an fhuinnimh, na n-amhábhar, na sláinte nó an bhia trí bhíthin réitigh nuálacha, rannpháirtíocht leis na saoránaigh agus le húsáideoirí deiridh agus trí ghlacadh réiteach nuálach sna réimsí sin sa tsochaí a neartú.

Déanfaidh EIT forbairt na dtáscairí sochaíocha sonracha i réimsí gníomhaíochta na PENanna a áirithiú agus forbairt a fhaireacháin rialta a áirithiú i gcomhréir le creat Fís Eorpach i dtaca le tionchar sochaíoch. Déanfaidh EIT i gcomhar leis an gCoimisiún táscairí breise, lena n-áirítear táscairí tionchair shochaíoch i réimse gníomhaíochta na PENanna, a fhorbairt i gcomhréir le forbairt chreat táscairí an chláir Fís Eorpach agus léireofar ann an cur chuige foriomlán faoina rannchuideoidh na Comhpháirtíochtaí Eorpacha leis an tionchar eolaíoch, eacnamaíoch agus sochaíoch. Ar an mórgóir féachfar le faireachán a dhéanamh ar an dul chun cinn a dhéanfar le himeacht ama i dtaca leis na cuspóirí a leagtar síos trí na táscairí tionchair a ailíniú le Fís Eorpach. Meastar go n-áiritheofar leis sin bonn faisnéise comparáideach ar thorthaí agus ar thionchair a chruthóidh na PENanna maidir leis an gcuid eile den chlár. Ina theannta sin, áiritheoidh EIT go ngabhfaidh an córas faireacháin an dul chun cinn i ndáil le gníomhaíochtaí atá sonracha do shamhail PEN, amhail comhtháthú thriantán an eolais agus scileanna fiontraíochta. Mar shampla, leis na táscairí maidir le gníomhaíochtaí EIT a bhaineann le hoideachas (na gníomhaíochtaí sin a thacaíonn le cumais na n-institiúidí ardoideachais san áireamh) déanfar faireachán ar ghnóthú scileanna caipitil dhaonna (gearrthéarmach), gairmréim (meántéarmach) agus dálaí oibre (fadtéarmach), rannpháirtíocht na n-institiúidí ardoideachais agus feabhsú ar a gcumas (gearrthéarmach) nó ról agus feidhmíocht na n-institiúidí ardoideachais in éiceachórais nuálaíochta áitiúla (meántéarmach agus fadtéarmach).

Leis an bhfaireachán leanúnach ar PENanna tabharfar aghaidh ar na gnéithe seo a leanas, *inter alia*:

- Dul chun cinn i dtreo inbhuanaitheacht airgeadais
- Dul chun cinn i dtreo cumhdach agus oscailteacht uile-Eorpach
- Éifeachtacht i luasghéarú gnó (i.e. fiontair ardfháis a chruthaítear agus a dtacaítear leo)
- Costais riaracháin agus bhainistíochta PENanna.

Ar an tábla thíos tá liosta neamh-uileghabhálach de phríomh-tháscairí feidhmíochta agus a gcuid spriocanna a meastar a ndéanfaidh EIT faireachán orthu in 2021-2027. Leis na táscairí sin cuirtear ar fáil na príomh-threoshuíomhanna ionchuir agus aschuir le faireachán a dhéanamh ar ghnóthú phríomhchuspóirí EIT don tréimhse 2021-2027 amhail nuálaíocht agus fiontraíocht a chothú trí bhíthin oideachas níos fearr, a thionchar áitiúil agus réigiúnach agus a oscailteacht do chomhpháirtithe agus do gheallsealbhóirí a mhéadú, lena n-áirítear cóimheá idir ioncam agus costais, bunú ionad nua comhlonnaithe agus réitigh nuálacha nua ar dhúshláin dhomhanda a chur ar an margadh.

Eochairtháscairí feidhmíochta	Sprioc 2023 (bonnlíne 2020)	Sprioc 2027 (bonnlíne 2020)
Líon na n-eintiteas/na n-eagraíochtaí atá rannpháirteach i ngníomhaíochtaí EIT agus PEN	ardú 20 %	ardú 50 %
Líon na nuálaíochtaí (táirgí agus seirbhísí) a seoladh ar an margadh	1.500	4.000
Institiúidí ardoideachais atá rannpháirteach i ngníomhaíochtaí EIT agus PEN	285	680
Líon na mac léinn atá rannpháirteach in imeachtaí oideachais EIT agus na PENanna	8.500	25.500
Líon na gcuideachtaí nuathionscanta dá dtugtar tacaíocht	300	700
Comhchistiúchán PENanna	EUR 700 milliún	EUR 1500 milliún
Líon na n-eintiteas/na n-eagraíochtaí atá rannpháirteach i ngníomhaíochtaí EIT agus PEN ó réigiúin lasmuigh de réigiúin ionaid chomhlonnaithe na PENanna	ardú 50 %	ardú 100 %

Áiríteofar le EIT go ndéanfar na sonraí tionscadail a bhailíonn sé trína chóras faireacháin inmheánach, lena n-áirítear na torthaí ó PENanna, a chomhtháthú go hiomlán i gcóras foriomlán bainistithe sonraí an chlár Fís Eorpach. Áiritheoidh EIT go gcuirfear ar fáil go tráthúil an fhaisnéis mhionsonraithe a eascraíonn as a phróiseas faireacháin agus meastóireachta agus go mbeidh rochtain uirthi i mbunachar sonraí comhchoiteann ar líne i dtaca le cur chun feidhme Fís Eorpach. Ina theannta sin, áiritheoidh EIT go ndéanfar tuairisciú tiomanta ar thionchair chainníochtúla agus cháilíochtúla, lena n-áirítear maidir le ranníocaíochtaí airgeadais a dtabharfar gealltanais ina leith agus ranníocaíochtaí airgeadais a chuirfear ar fáil go hiarbhír.

4.2.2. Meastóireacht, athbhreithniú eatramhach agus measúnú cuimsitheach

Is é an Coimisiún a dhéanfaidh na meastóireachtaí tréimhsiúla ar ghníomhaíochtaí EIT, lena n-áirítear na gníomhaíochtaí atá á mbainistiú trí na PENanna, i gcomhréir le forálacha an Rialacháin maidir le EIT agus an Rialacháin maidir le Fís Eorpach. I gcomhréir le hAirteagal 19, mír 2, de Rialachán EIT, déanfaidh na meastóireachtaí seo, go háirithe, measúnú ar éifeachtacht, éifeachtúlacht, ábharthacht, comhleanúnachas agus breisluach an Aontais a bhaineann le gníomhaíochtaí EIT, lena n-áirítear trína PENanna. Beidh siad bunaithe ar mheastóireachtaí seachtracha neamhspleácha agus cothóidh siad na meastóireachtaí eatramhacha agus deiridh ar Fís Eorpach.

Beidh gach PEN faoi réir athbhreithniú críochnúil arna dhéanamh ag EIT le tacaíocht ó shaineolaithe seachtracha roimh dheireadh an 7^ú bliain den chreat-chomhaontú comhpháirtíochta, chomh maith le hathbhreithniú deiridh roimh dheireadh an chreat-chomhaontaithe sin i gcás síneadh. Ar bhonn an chéad mheasúnaithe, cinntídh an Bord Rialaithe cé acu a chuirfidh nó nach gcuirfidh sé síneadh leis an gcreat-chomhaontú comhpháirtíochta níos faide ná na chéad seacht mbliana, agus úsáidfear an t-athbhreithniú deiridh mar bhonn le haon Mheabhrán Comhair breise a d'fhéadfadh a bheith ann a chaibidil. Sna meastóireachtaí seo, i gcomhréir le hAirteagal 11, mír 2, de Rialachán EIT, cuirfidh Bord Rialaithe EIT san áireamh, go háirithe, na critéir maidir le faireachán a leagtar amach do na Comhpháirtíochtaí Eorpacha sa Rialachán maidir le Fís Eorpach, baint amach cuspóirí PEN agus a chomhar le tionscnaimh taighde agus nuálaíochta ábhartha eile, an leibhéal inbhuanaitheachta airgeadais a baineadh amach, cumas PEN oscailteacht i leith comhaltaí nua a áirithiú, agus an méid a bhain sé amach maidir le comhaltaí nua a mhealladh, laistigh de theorainneacha ranníocaíocht airgeadais an Aontais dá dtagraítear in Airteagal 20 de Rialachán EIT, breisluach an Aontais agus ábharthacht maidir le cuspóirí EIT.

Ina theannta sin, i gcomhréir le hAirteagal 11, mír 1a, de Rialachán EIT, ullmhóidh EIT, faoi mhaoirseacht an Bhoird Rialaithe, athbhreithnithe eatramhacha ar fheidhmíocht agus ar ghníomhaíochtaí na PENanna lena gcumhdófar na chéad trí bliana den chreat-chomhaontú comhpháirtíochta (i.e. céim thionscnaimh na PENanna) agus, i gcás inarb iomchuí, trí bliana tar éis a shínte (i.e. an chéim aibíochta). Beidh na hathbhreithnithe sin bunaithe ar an bhfaireachán bliantúil a dhéanfaidh EIT; cuideoidh siad le Bord Rialaithe EIT luath-tháscaire a fháil maidir le feidhmíocht na PENanna i ndáil lena straitéis agus a spriocanna, agus maidir le comhlíonadh tháscairí Bhord Rialaithe EIT.

I gcomhréir le hAirteagal 11, mír 3, de Rialachán EIT, i gcás ina léireofar leis an bhfaireachán leanúnach, na hathbhreithnithe eatramhacha nó na measúnuithe cuimsitheacha ar PEN nach bhfuil dul chun cinn leordhóthanach déanta i réimsí dá dtagraítear in Airteagal 10 nó go bhfuil easpa breisluacha Eorpaigh iontu, déanfaidh an Bord Rialaithe bearta ceartaitheacha iomchuí. D'fhéadfadh sé gur laghdú, modhnú nó tarraingt siar na ranníocaíochta airgeadais le EIT a bheadh i gceist leis na bearta ceartaitheacha sin, chomh maith le moltaí ceangailteacha a bhaineann le gníomhaíochtaí PENanna nó moltaí maidir lena samhlacha seachadta agus oibríochtúla a oiriúnú.

Cuirfear torthaí na n-athbhreithnithe eatramhacha agus na meastóireachtaí sin ar fáil go poiblí, cuirfear in iúl do Ghrúpa Ionadaithe na mBallstát iad agus tuairisceofar iad don phróiseas um chomhordú straitéiseach maidir le Comhpháirtíochtaí Eorpacha.

5. IARSCRÍBHINN 1A

Is é an réimse tosaíochta le haghaidh Pobal Eolais agus Nuálaíochta nua a sheoladh in 2023:

Earnálacha Cultúir agus Cruthaitheachta.

Is é seo a leanas an liosta de réimsí tosaíochta a d'fhéadfadh a bheith ann chun an dara Pobal Eolais agus Nuálaíochta nua a sheoladh in 2026:

- Uisce, Mara agus Muirí
- Slándáil agus Athléimneacht
- Cuimsiú, Lánpháirtiú agus Imirce

6. IARSCRÍBHINN 1B

BILEOG EOLAIS FAOI "EARNÁLACHA CULTÚIR AGUS CRUTHAITHEACHTA" AN PHOBAIL EOLAIS AGUS NUÁLÁÍOCHTA

An Dúshlán

Féadfaidh earnálacha cultúir agus cruthaitheachta (ECCanna) réiteach cothrománach a thabhairt ar réimse dúshlán atá ag teacht chun cinn, dúshlán de chineál buan, agus ar féidir aghaidh a thabhairt orthu trí bhíthin gníomhaíochtaí taighde agus nuálaíochta. Is féidir na dúshláin sin a ghrúpáil i gceithre cholún: 1) cruthaitheacht, éagsúlacht chultúrtha agus luachanna mhuintir na hEorpa; 2) an fhéiniúlacht agus an comhtháthú Eorpach; 3) fostaíocht san Eoraip, athléimneacht eacnamaíoch agus fás cliste; agus 4) an Eoraip mar ghníomhaí domhanda.

Braitheann cruthaitheacht agus éagsúlacht chultúrtha mhuintir na hEorpa ar earnálacha cultúir agus cruthaitheachta a bheith athléimneach láidir. Mar sin féin, tá roinnt dúshlán roimh na hearnálacha sin, an earnáil closamhairc nó an earnáil ceoil go háirithe, de dheasca iomaíocht mhéadaithe atá ag teacht ó ghníomhaithe domhanda agus mar thoradh ar an aistriú digiteach.

- Ní mór do léiritheoirí, dáileoirí, craoltóirí, amharclanna scannánaíochta agus gach cineál eagraíochta cultúrtha a bheith nuálach chun glúine nua de lucht féachana a mhealladh.
- Baineann an ganntanas fiontraíochta agus scileanna leathana in ECCanna¹⁰ le fo-earnálacha atá ag teacht chun cinn chomh maith le fo-earnálacha an-aibí a dtagann claochlú digiteach domhain orthu. Tá gá leis na scileanna le haghaidh na nuálaíochta agus tá siad ríthábhachtach i bhfianaise na n-athruithe atá roimh an margadh saothair san earnáil.

Is féidir dúshlán shochaíocha a bhaineann leis **an bhféiniúlacht agus an comhtháthú Eorpach** a thuairisciú i dtéarmaí easpa "droichead" lenar féidir codanna éagsúla den tsochaí a nascadh le chéile lena n-áirítear críocha éagsúla. Orthu sin tá saincheisteanna a bhaineann le heisiamh sóisialta, an gá le naisc idirchultúrtha níos dlúithe a chur le chéile agus muintearas coiteann a fhorbairt bunaithe ar an éagsúlacht chultúrtha agus an oidhreacht choiteann atá againn, ar saincheisteanna iad ar féidir aghaidh a thabhairt orthu trí bhíthin comhpháirtíocht pobail níos cuimsithí agus níos inrochtana, nuálaíocht i réimse an deartha, na hailtireachta agus úsáid spásanna poiblí, chomh maith le nuálaíocht shóisialta arna stiúradh ag an gcultúr. Go háirithe an méid seo a leanas:

- Níl ach comhar teoranta ann idir taighdeoirí agus idir lucht taighde agus tionscail agus is ar bhonn neamhleor a dhéantar comhordú ar iarrachtaí taighde agus forbartha agus ar mhodhanna, torthaí agus dea-chleachtais a chomhroinnt.
- Tá an leibhéal comhtháthaithe a dhéantar ar chnuasaigh chruthaitheachta agus ar mhoil nuálaíochta neamhleor.
- Tá sciar suntasach de na tosaíochtaí speisialaithe cliste réigiúnacha san Eoraip a dhéanann tagairt don chultúr i gcomhthéacsanna éagsúla (e.g. oidhreacht chultúrtha, tionscail chruthaitheacha, etc.). I bhfianaise an róil thábhachtaigh a bhíonn ag an gcultúr agus ag an geruthaitheacht i dtaca le forbairt eacnamaíoch agus shóisialta cathracha agus réigiún agus an chumais atá iontu chun tuilleadh cuidithe a thabhairt i dtaca le haghaidh a thabhairt ar shaincheisteanna éagothromaíochta ar fud na hEorpa, tá poitéinseal ard sa PEN ECC.

¹⁰ Is "ar an ngné chruthaitheach" is mó a dhírítear sna staidéir chultúrtha agus chruthaitheacha in ollscoileanna na hEorpa agus ní i gcónaí a bhíonn a gcéimithe ullamh chun dul ar an margadh saothair toisc nach mbíonn scileanna trasearnála (fiontraíochta, digiteacha agus bainistíochta airgeadais) acu. I dtaca le hinstiúidí ardoideachais, tá an tAontas ar gcúl i gcomparáid le Stáit Aontaithe Mheiriceá ó thaobh staidéir ar an gCumarsáid agus ar na Meáin (agus san am céanna tá ollscoileanna an Aontais ag feidhmiú níos fearr i ndisciplíní níos traidisiúnta amhail Ealaín agus Dearadh nó sna Taibh-Ealaíona).

Ar na dúshláin a bhaineann le **fostaíocht san Eoraip, athléimneacht eacnamaíoch agus fás cliste**, tá saincheistean eacnamaíocha, amhail an dífhostaíocht (an dífhostaíocht i measc na hóige go háirithe) agus iomaíocht dhomhanda.

- Tá comhdhlúthacht an mhargaidh ard: is sa Ghearmáin, sa Ríocht Aontaithe agus sa Fhrainc a ghintear thart ar 50 % den láimhdeachas agus den bhreisluach iomlán.
- Is dúshláin iad do thionscail na hEorpa an digitiú agus an domhandú agus an tionchar cumhachtach a bhíonn acu ar an tslí a ndéanann ealaíontóirí a gcuid saothar a tháirgeadh agus a dháileadh agus a ndéanann siad caidreamh lena lucht éisteachta.
- Is minic a bhíonn dúshlán roimh léiriúcháin chruthaitheacha, chultúrtha agus ealaíonta airgead a ghnóthú as a n-aschur agus a dtáirgí, rud a chruthaíonn réimsí oibre neamhbhuana dá bharr. Ba cheart teacht ar bhealaí nuálacha nua le tacú le micrea-eagraíochtaí agus fiontair chruthaitheacha agus chultúrtha ar scála beag agus ar mheánscála.

Ar deireadh, áirítear sa ról atá ag an **Eoraip mar ghníomhaí domhanda** an gá le feabhas a chur ar scaipeadh an ábhair chultúrtha a chruthaítear san Eoraip. Ní mór don Eoraip leanúint de bheith iomaíoch sa rás digiteach domhanda chun teicneolaíochtaí nua a chruthú (e.g. intleacht shaorga, Idirlíon na Rudaí Nithiúla, blocshlabhra) dá bhfuil ECCanna ina bhforbróirí tábhachtacha ábhair, táirgí agus seirbhísí ar fud an domhain. Thairis sin, rannchuidíonn ECCanna (e.g. dearadh, ailtireacht, etc.), ar scála domhanda, leis an bhforbairt inbhuanaithe agus spreagann siad nuálaíocht ghlas, agus san am céanna féadtar feasacht ar fhadhbanna éiceolaíocha a ardú agus tuairimí an phobail a shuibhriú, trí bhíthin ábhar cultúrtha (litríocht, an scannánaíocht agus na healaíona), de bhreis ar a luach ann féin.

Ábharthacht agus Tionchar

Cuideoidh PEN EIT i dtaca le ECC – mar gheall ar an gcur chuige iomlánaíoch comhtháite a bhíonn ann – le haghaidh a thabhairt ar na dúshláin uile a shainítear thuas. Trí gach earnáil dár saol, dár sochaí agus dár ngeilleagar a chumhdach nach mór, beidh PEN den chineál sin an-ábhartha i dtaca le tionchar eacnamaíoch agus sochaíoch agus cuirfidh sé deiseanna straitéiseacha ar fáil le haghaidh nuálaíocht eacnamaíoch, theicneolaíoch agus shóisialta.

Le nuálaíochtaí atá cultúr bhunaithe agus spreagtha ag an gcruthaitheacht cuirtear borradh faoin iomaíochas Eorpach go díreach trí fhiontair agus poist nua a chruthú nó go hindíreach trí shochair thrasearnála don gheilleagar i gcoitinne a chruthú, caighdeán na beatha a fheabhsú agus tarraingteacht na hEorpa a mhéadú. Is minice anois a mheastar gurb é atá in ECCanna foinsí fáis agus post atá cliste, inbhuanaithe agus cuimsitheach, ina bhfuil breis agus dhá mhilliún déag duine fostaithe cheana san Aontas, agus is ionann sin agus 7.5% de phobal uile an Aontais atá fostaithe.

Ní le tionchar díreach ECC amháin ar an nuálaíocht a bhaineann rannchuidiú an chultúir agus na cruthaitheachta, toisc gurb iad tosca neamhtheicneolaíocha amhail cruthaitheacht, dearadh agus próisis eagraíochta nó samhlacha gnó nua a spreagann an nuálaíocht i gcoitinne. Go háirithe, i dtaca le ECC a bhfuil slabhraí luacha ar leith ag baint leo (i.e. ceol, ealaíona, dearadh, faisean, ábhar closamhairc, físchluichí, ailtireacht ...) bíonn cumas nuálaíochta láidir i dtéarmaí eacnamaíocha acu agus is féidir leo an nuálaíocht in earnálacha eile den gheilleagar a spreagadh.

Bíonn tionchar díreach ag cultúr agus ag rannpháirtíocht i ngníomhaíochtaí cultúrtha ar fholláine na saoránach agus ar chuimsiú sóisialta. Cuireann ECC le luacha sochaíocha na féiniúlachta, an daonlathais agus na rannpháirtíochta sa phobal. Tá acmhainneacht ag an gcultúr muintearas Eorpach a atreisiú, i gcás inar buntáiste í an éagsúlacht. Tá tábhacht bhunúsach ag baint leis an méid sin chun go bhféadfaidh athléimneacht, rochtain shóisialta, comhtháthú sochaíoch agus cothromaíocht inscne bheith ann, agus le dul i ngleic le héiginnteachtaí polaitiúla na hEorpa agus an gá atá le haontas.

Le PEN EIT bunaithe ar ECC deiseanna líonra, déanfar comhoibriú, comhchruthú agus aistriú feasa gnó idir lucht oideachais, lucht taighde agus lucht gnó a chumasú laistigh de na hearnálacha cultúir agus cruthaitheachta agus le hearnálacha eile den tsochaí agus den gheilleagar. Leis sin cuirfear tús le tionscnaimh ón mbonn aníos agus le tionscnaimh ón mbarr anuas ar leibhéal réigiúnach agus náisiúnta agus ar leibhéal an Aontais. Forbrófar leis sin na creatdálaí is gá le haghaidh fiontair nua a fhorbairt agus a mhéadú in éiceachórais nuálacha. An t-eolas agus na scileanna is gá chun réitigh nuálacha a chur ar fáil agus chun deiseanna gnó nua a dhéanamh díobh, cuirfear iad sin ar fáil trína bhíthin do thaighdeoirí agus do mhic léinn in an-chuid disciplíní (lena n-áirítear na healaíona, na daonnachtaí, gnó, na heolaíochtaí sóisialta agus na crua-eolaíochtaí feidhmeacha) agus d'fhiontraihte in ECC agus in earnálacha eile. Cumasófar leis tuilleadh cros-toirchithe le hearnálacha eacnamaíocha agus tionsclaíochta eile agus é ag feidhmiú mar luasaire le haghaidh na nuálaíochta.

Sineirgí agus Comhlántachtaí le tionscnaimh atá ann cheana

Bheadh PEN faoi ECC comhlántach le líon tionscnamh eile de chuid an Aontais chomh maith agus a bheadh ar leibhéal na mBallstát. Leagtar amach anseo thíos na príomhshineirgí a bhfuiltear ag súil leo ar leibhéal an Aontais.

Beifear ag súil go ndéanfaidh PEN i réimse ECC sineirgí láidre le tionscnaimh bheartais ábhartha faoin gClár Fís Eorpach, agus go háirithe faoi Cholún II leis an gcnuasach [An tSochaí Chuimsitheach agus Shlán] agus lena réimsí idirghabhála i dtaca leis an Oidhreacht Chultúrtha agus an Daonlathas. D'fhéadfadh PEN amach anseo ionchuir luachmhara chothrománacha a dhéanamh ar ghníomhaíochtaí éagsúla atá le déanamh sa chnuasach [An Teicneolaíocht Dhigiteach agus an Tionscal] i dtaca leis na teicneolaíochtaí monaraíochta go háirithe mar a mbítear ag brath go mór ar ECC chun táirgí nua a fhorbairt. Anuas air sin, d'fhéadfadh sé comhlánú éifeachtúil a dhéanamh ar chodanna eile den Chlár Fís Eorpach, idirghabháil EIT Digiteach atá ann cheana agus na gníomhaíochtaí dá bhforáiltear faoi chlár eile de chuid an Aontais amhail InvestEU, An Clár don Eoraip Dhigiteach nó Cistí an Bheartais Comhtháthaithe.

Beidh clár nua Eoraip na Cruthaitheachta ábhartha go sonrach i ndáil le gníomhaíochtaí PEN i réimse ECC. Is é atá sa Chlár sraitheanna oibre a roghnaíodh agus glaonna speisialta ina léirítear roinnt de na dúshláin a luaitear cheana atá roimh an earnáil (e.g. scileanna, fostaíocht agus samhlacha gnó san earnáil chruthaitheach etc.) agus ba cheart sineirgí agus comhlántachtaí láidre a fhorbairt dóibhsean. Faoi InvestEU, agus i gcomhthéacs na rochtana teoranta ar chistiú a bhíonn ag na hearnálacha cultúrtha agus cruthaitheacha, d'fhéadfaí a bheith ag súil le sineirgí le Saoráid Ráthaíochta Earnáil an Chultúir agus na Cruthaitheachta, sásra airgeadais lena gcuidítear le tionscadail chultúrtha agus chruthaitheacha trí árachas a sholáthar d'idirghabhálaithe airgeadais.

Le hardán na Straitéise um Speisialú Cliste (S3) i dtaca le Nuachóiriú Tionsclaíoch sainaitníodh roinnt straitéisí taighde agus nuála faoina ndírítear ar ECC agus fiosraítear naisc nua idir sócmhainní áitiúla, margaí ionchasacha agus dúshláin shochaíocha trí rannpháirtíocht roinnt mhór de ghníomhaithe fiontraíocha. Go háirithe, is ceist mhór do straitéisí S3 comhpháirtíochtaí nua idir eagraíochtaí taighde, fiontair agus údaráis phoiblí a chur chun cinn, ar gá ardáin chomhoibritheacha nua a chur ar bun dá mbarr.

Conclúid

Is é PEN EIT bunaithe ar ECC is fearr a fhéadfaidh aghaidh a thabhairt ar na dúshláin mhóra eacnamaíocha agus shochaíocha a leagtar amach thuas. Tá an chruthaitheacht ar cheann de phríomhspreagthaí na nuálaíochta agus bheadh an cumas ag PEN i réimse ECC leas iomlán a bhaint as poitéinseal na cruthaitheachta cultúr bhunaithe agus cuidiú le hiomaíochas na hEorpa agus an fás cliste a neartú.

Déanfar le PEN EIT bunaithe ar ECC an méid seo a leanas:

- Ilroinnt an chúlra nuálaíochta in earnálacha an chultúir agus na cruthaitheachta a laghdú trí chruthú na n-éiceachóras nuálaíochta a chothú lena nascfar gníomhaithe agus gréasáin ar fud earnálacha agus disciplíní éagsúla ar leibhéal áitiúla, réigiúnacha agus náisiúnta agus ar leibhéal an Aontais.
- An chéad ghlúin eile de nuálaithe in earnálacha ECC a oiliúint trí na scileanna fiontraíochta agus teicniúla is gá chun bheith rathúil i dtimpeallacht shíorathraitheach a thabhairt dóibh.
- Rannchuidiú leis na creatdálaí cearta a fhorbairt chun smaointe a aistriú ina bhforbairtí teicneolaíochta nua agus leis an nuálaíocht shóisialta lena gcuirfear feabhas ar cháilíocht bheatha na saoránach Eorpach agus a rachaidh chun a leasa.
- Cruthú agus forbairt fiontar nua sna hearnálacha cultúir agus cruthaitheachta a chothú trí infheistíocht agus gealltanais fadtéarmach na hearnála gnó a úsáid.
- Sineirgíocht a dhéanamh le PENanna atá ann cheana, agus le comhpháirtíochtaí, cláir agus tionscnaimh Eorpacha eile chun an nuálaíocht a spreagadh lasmuigh de na hearnálacha cultúir agus cruthaitheachta in earnálacha eile den gheilleagar.
- Seasamh an Aontais mar ghníomhaí domhanda in ECC a neartú trí leas a bhaint as cruthaitheacht agus éagsúlacht chultúrtha mhuintir na hEorpa.